

本

經

逢

原

本經逢原卷二

長洲石頑張璐路玉父纂述

男

以柔安世

參訂

訥遜言

芳草部

當歸 甘辛溫無毒蜀產者力剛可攻秦產者力柔可補凡治本病酒制有痰薑汁嗽白者爲粉歸性劣不入補劑

本經主欬逆上氣溫瘧寒熱先先生皮膚中婦人漏

下絕子。諸惡瘡瘍。金瘡。煮汁飲之。

發明 當歸氣味俱厚。可升可降。入手少陰足太陰厥陰血分。凡血受病及諸病夜甚。必須用之。本經主欬逆上氣。溫瘧寒熱。洒洒。婦人漏下。絕子。皆取辛溫潤血之功。產後惡血上衝。亦必用之。別錄溫中止痛。甄權治下痢腹痛。女人瀝血腰痛。好古治衝脈爲病。逆氣裏急。帶脈爲病。腹痛。腰溶溶若坐水中。其功專於破惡血。養新血。潤腸胃。榮筋骨。澤皮膚。理癰疽。排膿止痛。蓋血壅而不流則痛。當歸甘溫能和營血。辛

溫能散內寒。使氣血各有所歸。入手少陰。心主血也。入足大陰。脾裏血也。入足厥陰。肝藏血也。身能養血。尾能行血。同人參黃耆。則補氣而生血。同牽牛大黃。則行氣而瀉血。同桂附吳萸。則熱。同大黃芒硝。則寒。血虛以人參赤脂爲佐。血熱以生地條芩爲佐。仲景治陽邪陷陰。手足厥寒。脈細欲絕。用當歸四逆湯。於桂枝湯加當歸細辛通草。以通其血脈。卽下痢脈大。氣不歸附。亦用此湯。以歸附之。凡血虛發熱者。宜當歸補血湯。方用當歸三錢。黃耆一兩。作三服。心下刺。

痛者一味當歸酒煎服專主血分諸病海藏言當歸
血藥何本經治欬逆上氣按當歸辛散乃血中氣藥
故欬逆上氣有陰虛陽無所附者用血藥補陰則血
和而氣降矣凡衝任督帶病皆不可少惟泄瀉家痰
飲家禁用

芎藭

綱目名
川芎

辛溫無毒蜀產者味辛而甘爲上他
處產者氣味辛烈爲下反藜蘆葉名藜蘆

本經主中風人腦頭痛寒痺筋攣緩急金瘡婦人血
閉無子

發明 芎藭辛溫。上升入肝經。行衝脈。血中理氣藥也。故本經治中風人腦頭痛等證。取其辛散血分諸邪也。好古言搜肝氣。補肝血。潤肝燥。補風虛。又治一切風氣血氣。及面上遊風。目疾多淚。上行頭目。下行血海。故四物湯用之者。皆搜肝經之風。治少陽厥陰頭痛及血虛頭痛之聖藥。助清陽之氣。去溼氣在頭。頭痛必用之藥。血痢已通而痛不止。乃陰虧氣鬱藥中加芎藭。氣行血調。其痛立止。靈苑方驗胎法。以生芎藭末艾湯服一錢。七腹中微動者爲胎。千金方治

子死腹中。以芎藭末酒調方寸匙。須臾二三服立出。
凡骨蒸盜汗。陰虛火炎。欬嗽吐逆。及氣弱之人。不可
服。其性辛散。令真氣走泄。而陰愈虛也。

撫芎 辛溫無毒。產江左撫州。心有孔者是。

發明 撫芎升散。專於開鬱。寬胸。通行經絡。鬱在中
焦。則胸膈痞滿作痛。須撫芎開提其氣。以升之。氣升
則鬱白降。故撫芎總解諸鬱。直達三焦。爲通陰陽氣
血之使。然久服耗氣。令人暴亡。

蛇牀 苦辛溫無毒

本經主男子陰痿溼癢婦人陰中腫痛除痺氣利關節癰癤惡瘡

發明 蛇床辛香性溫專入右腎命門少陽三焦氣分本經列之上品不獨助男子壯火且能散婦人鬱攸非妙達本經精義不能得從治之法也但腎火易動陽強精不固者勿服

藁本 辛苦溫無毒香而燥者良臭而潤者勿用本經主婦人疝瘕陰中寒腫痛腹中急除風頭痛長肌膚悅顏色

發明 藁本性升屬陽爲足太陽寒鬱經中頭項巔
頂痛及大寒犯腦連齒頰痛之專藥。女人陰腫疝疼。
督脈爲病脊強而厥亦多用之。霧露之邪中於上焦。
須兼木香。風客於胃泄瀉脾胃藥中宜加用之。今人
只知藁本爲治巔頂頭腦之藥。而本經治婦人疝瘕。
腹中急。陰中寒等證。皆太陽經寒溼爲病亦屬客邪。
內犯之候。故用藁本去風除溼。則中外之疾皆瘳。豈
特除風頭痛而已哉。云長肌肉悅顏色者。外用作面
脂之類是也。但頭痛挾內熱。春夏溫病熱病頭痛口

渴及產後血虛大炎頭痛皆不可服。

白芷

卽都梁香

辛苦溫無毒

本經主女人漏下赤白血閉陰腫寒熱頭風。侵目淚出。長肌膚潤澤顏色。可作面脂。

發明 白芷辛香升發行手陽明性溫氣厚。行足陽明芳香上達入手太陰爲解利陽明風熱頭痛及寒熱頭風。侵目淚出之要藥。其所主之病不離三經。如寒熱頭風。眉稜骨痛。頭目齒痛。三經之風熱也。漏下赤白癰疽。頭面皮膚風痺燥癢。三經之溼熱也。風熱

者辛以散之。溼熱者溫以除之。都梁丸治崩漏赤白。深得本經之旨。性善祛風。女人漏下赤白。皆風入胞門所致。辛香入脾。故又能溫散血閉陰腫。及寒熱頭風。侵目淚出。總取辛散利竅之功。其長肌膚潤澤顏色者。則有排膿長肉之力。所以外科用之。痘疹起脹。連皮腫者。於解毒藥內用之。預杜將來發癢之患。今人用治腸癰。有敗膿淋漓不已。腥穢殊甚。遂致臍腹冷痛。須此排膿。膿盡。乃以他藥補之。燒爛碎蟲蛇。爲末。新汲水調頻灌。解蛇毒內攻。和膽礬麝香。搽蛇傷。

潰爛。但性溫而升。味苦而散。故嘔吐因於熱者。漏下
赤白。因於火者。勿用。癰疽潰後。亦宜漸減。以其能耗
胃氣也。

白芍藥

酸苦平微寒。無毒。入補脾藥。酒炒入止血
藥。醋炒入和營藥。及下痢後重。血熱癰毒藥。並酒洗
生用。入血虛水腫腹脹藥。桂酒制用。反藜蘆。

本經主邪氣腹痛。除血痺。利小便。益氣。

發明 白芍藥酸寒。斂津液而護營血。收陰氣而瀉
邪熱。蓋瀉肝之邪熱。所以補脾之陰。卽本經主邪氣。

腹痛益氣之謂。故仲景以爲補營首藥。入肝脾血分。及陽維寒熱帶脈腹痛。補中下二焦。能於土中瀉木。爲血痢必用之藥。然須兼佳用之。方得斂中寓散之義。建中湯之妙。用人所不知。蓋瀉痢皆太陰之病。建中專主太陰腹痛也。其治血痺黃著桂枝五物湯中用之。非深達本經妙理者不能也。又得炙甘草治腹中急痛。同白朮補脾。同芍藥瀉肝。從人參補血虛。從黃連止瀉痢。同薑棗溫經散溼。在用者各得其宜耳。凡人陽氣虛衰。陰氣散漫。患腹脹滿急於補中益氣。

藥中加白芍藥一味以收陰則陽虛不受陰制之脹。得陽藥便消矣。然氣虛內寒者不可用。古云減芍藥以避中寒。誠不可忽。產後不可用。以其酸寒瀉肝伐生發之氣也。小便不利者禁用以膀胱得酸收斂愈秘也。而真武湯中又用以利小便者。深得本經之旨。蓋真武湯本治少陰精傷而證見虛寒。非太陽膀胱癃閉之候。以其能益陰滋血培養津液。小便自行。非通利也。至於桂枝湯中用以護營血使邪不得內犯。建中湯中用以培土藏而治陽邪內陷腹痛。此皆仲

景用藥之微妙。端不外本經之義。其除血痺破堅積。治寒熱疝瘕。止痛利小便。皆指赤者而言。與白芍無預。因本經未分赤白。故一貫例之。

赤芍藥 酸苦微寒無毒酒洗用

本經除血痺破堅積寒熱疝瘕止痛利小便

發明 赤芍藥性專下氣。故止痛不減。當歸蘇恭以爲赤者利小便下氣。白者止痛和血。端不出本經除血痺破堅積止痛利小便之旨。其主寒熱疝瘕者。善行血中之滯也。故有瘀血留著作痛者。宜之。非若白

者酸寒收斂也。其治血痺利小便之功。赤白皆得應。用要在配合之神。乃著奇勛耳。

牡丹皮 苦辛平無毒。酒洗去鹼土。曝乾勿見火。

本經主寒熱中風。癰癰驚癰邪氣。除癥堅瘀血。留舍腸胃五藏。療癰瘡。

發明 牡丹皮入手足少陰厥陰。治血中伏火。故相火勝腎無汗。骨蒸爲專藥。本經主寒熱中風。癰癰驚癰等證。以其味辛氣竄。能開發陷伏之邪外散。惟自汗多者勿用。爲能走泄津液也。痘疹初起勿用。爲其

性專散血。不無根脚散濶之慮。王安道云。志不足者。足少陰病也。故仲景腎氣丸用之。後人惟知黃檗治相火。不知丹皮之功更勝也。又癥堅瘀血。留舍腸胃五藏。及陰虛吐血。衄血。必用之藥。以能行瘀血。而又能安好血。有破積生新。引血歸經之功。故犀角地黃湯用之。凡婦人血崩。及經行過期不淨。屬虛寒者。禁用。又赤者利血。白兼補氣。亦如赤白芍藥之義。諸家言其性寒。安有辛香而寒者乎。

木香

辛苦溫。無毒。形如枯骨。味苦。色淡黃者良。味

鹹色黑勿用。生用理氣煨熟止瀉。

本經主邪氣辟毒疫強志主淋露。

發明 木香氣香味厚。不獨沉而下降。蓋能理胃以
下氣滯。乃三焦氣分之藥。兼入肺脾肝三經。能升降
諸氣。故上焦氣滯。膈鬱宜之者。金鬱則泄之也。然雖
入肺。而肺燥氣上者。良非所宜。其中焦氣滯不運。宜
之者。脾胃喜芳香也。下焦氣滯後重。宜之者。塞者通
之也。若治中脘氣滯不運。心腹疼痛。以檳榔佐之。使
氣下則結痛下散矣。本經辟疫毒邪氣強志止淋露。

以其辛燥助陽。善開陰經伏匿之邪。大明治心腹一切氣膀胱冷痛。嘔逆反胃。霍亂瀉痢。健脾消食。安胎。甄權治九種心痛。積年冷氣。疥癬。癥塊。脹痛。壅氣上衝。煩悶。羸劣。女人血氣刺痛。不可忍。然香燥而偏於陽。肺虛有熱。血枯而燥。及陰火衝上者。勿服。

甘松香

甘溫無毒

發明 甘松芳香升竅。能開脾鬱。少加脾胃藥中。甚醒脾氣。主惡氣。卒心腹痛滿。風疳齒齩。得白芷白附子。良。脚氣膝腫。煎湯淋洗。効。

山柰

辛溫無毒

發明 山柰芳香入陽明煖胃辟瘴癘惡氣治心腹冷氣痛寒溼霍亂風蟲牙痛皆芳香正氣之力也。

高良薑

辛大溫無毒煖熟用子名紅薑薤

發明 良薑辛熱純陽上升入足陽明太陰二經爲客寒所犯則逆冷霍亂腹痛諸病生焉辛溫煖脾胃而逐寒邪則胃中冷逆自除霍亂腹痛自愈甄權治腹內久冷氣痛去風冷痺弱大明主轉筋瀉利反胃解酒毒消食蘇頌治惡心嘔清水皆取煖胃溫中散

寒之功也。而寒痼小腹掣痛。須同茴香用之。產後下
焦虛寒。瘀血不行。小腹結痛者。加用之。若胃火作嘔。
傷暑霍亂。禁用。爲其溫燥也。○紅苳蔻辛溫。主水瀉
霍亂。心腹絞痛。止嘔進食。大補命門相火。故正元丹
中用之。然能動火。傷目致衄。不宜久服。

草豆蔻

辛溫。溫無毒。麪裹煨熟去麪用。

發明 草豆蔻性溫。入脾胃二經。東垣曰。風寒客邪。
在胃口之上。當心疼痛者。宜之。丹溪曰。草豆蔻性溫。
能散滯氣。若明知口食寒物。胃脘作疼。或溼鬱成病。

者用之神効。若熱鬱者不可用。恐積溫成熱也。然多用能助脾熱。傷肺損目。故陰虛血燥者忌之。

草果

亦名豆蔻

辛溫。清無毒。去殼生用。

發明 草果與草豆蔻總是一類。其草果治病取其辛熱浮散。能入太陰陽明。除寒燥溼。開鬱化食。利膈上痰。解麪溼魚肉諸毒。與知母同用。治瘴瘧寒熱。取其一陰一陽無偏勝之害。蓋草果治太陰獨勝之寒。知母治陽明獨勝之火也。然瘧亦有不由於嵐瘴氣而實邪不盛者。忌服。凡溼熱痰滯傷暑。暴注洩赤口

乾者禁用

白豆蔻

俗名殼蔻

辛溫無毒忌見火去淨隔膜不爾令人

隔滿凡草果草豆蔻縮砂皆然不獨白豆蔻也

發明 白豆蔻辛香上升入脾肺二經散肺中滯氣

治脾虛癰疾嘔吐寒熱能消能磨流行三焦營衛一
轉諸證自平古方治胃冷積氣嘔逆反胃消穀下氣
寬膈進食解酒毒皆相宜也若火升作嘔蘊熱作痛
者勿服

縮砂密

俗名砂仁

辛溫瀟無毒

發明 縮砂屬土醒脾調胃爲脾胃肺腎大小腸膀胱七經之氣藥能引諸藥歸宿丹田治脾虛泄瀉宿食不消瀉痢白沫腹中虛痛寒飲脹痛噎膈嘔吐和中行氣止痛安胎用之悉效同熟地茯苓納氣歸腎同檀香豆蔻下氣安肺得陳皮白朮和氣益脾惟新產婦忌之恐氣驟行動血也今人治血痢亦多用之若積欲盡時良非所宜又血虛火炎欬嗽禁用妊婦氣滯者宜服若氣虛者多服反耗其氣多致難產南人性喜條暢食品每多用之北人性喜潛藏藥中亦

罕用者。

益智子

辛溫無毒去殼鹽水炒用

發明 益智行陽退陰三焦命門氣弱者宜之脾主
智此物能益脾胃理元氣補腎虛滑精胃虛多唾女
人崩漏治心氣不足夢泄夜多小便及冷氣腹痛於
土中益火也集驗方縮泉丸治脬氣不足方用益智
子鹽炒去鹽與烏藥等分爲末酒煮山藥粉爲糊丸
如梧子大空心鹽湯下七十九丸丹方治夜多小便取
二十四枚入鹽同煎服之有驗按益智功專補火如

血燥有火。溼熱暴注。及因熱而遺濁。色黃乾結者。不可誤用也。

葦芩 辛大溫無毒。醋浸刮去皮子。免傷肺上氣。

發明 葦芩辛熱浮散。爲頭疼鼻淵要藥。取其能入陽明經。散浮熱也。性能溫中下氣。治霍亂水瀉。心腹滿者。宜之。然辛熱耗散。能動脾胃之火。多用令人喘欬。目昏。腸虛下重。以其走泄真氣也。

蒟葉

子名蒟醬

辛溫無毒

發明 蒟葉辛熱。能下氣溫中。破痰散結。氣解瘴癘。

嶺南人以葉合檳榔食。取其辛香。能破瘴癘之氣也。其子可以調羹。故謂之醬。華菱之類也。

肉豆蔻

俗名肉果

辛溫無毒。糯米粉裏煨熟用。勿犯鐵。

發明 肉豆蔻辛香。入手足陽明。溫中補脾。寬膨脹。固大腸。爲小兒傷乳吐逆泄瀉之要藥。二神丸合補骨脂治腎瀉。蓋取補脾以治腎邪也。按脾土性喜芳香。故肉果與脾胃最爲相宜。以其能下氣者。脾胃得補。則健運。非若厚朴枳實之峻削也。熱鬱暴注禁用。以其辛溫性滯也。

補骨脂

俗名破故布字音相近之類也

苦辛大溫無毒鹽酒浸焙

乾用與胡麻同炒良忌葵藿羊肉諸血

發明

補骨脂屬火收斂神明能使心胞之火與命

門之火相通使元陽堅固骨髓充實濇以固脫也胡

桃屬水潤燥養血血屬陰惡燥故油以潤之佐補骨

脂有水火相生之妙故局方青娥丸用之孫思邈言

補腎不若補脾許學士言補脾不若補腎腎氣虛弱

則陽氣衰劣不能蒸蒸脾胃令人痞滿少食譬如釜

無火雖終日不熟陽衰則飲食亦不能消化濟生

二神丸治脾腎虛寒泄瀉用補骨脂補腎肉豆蔻補脾加吳茱萸以平其肝加木香以順其氣使之斡旋若精傷溺赤瀉痛者去木香易五味子腰膝痠疼腎冷精流者用之屢効凡陰虛有火夢泄溺血大便閉結者勿施

薑黃 辛苦溫無毒藏器曰辛少苦多性熱不冷或云大寒誤矣有二種蜀川生者色黃質嫩有鬚折之中空有眼切之分爲兩片者爲片子薑黃江廣生者質粗形扁如乾薑僅可染色不入湯藥今藥肆混市

誤人徒有耗氣之患。而無治療之功也。

發明 薑黃鬱金蓬朮三物形狀功用皆相近。但鬱金人心專治心包之血。薑黃入脾兼治血中之氣。蓬朮入肝兼治氣中之血。爲不同耳。古方三痺湯用片子薑黃治風寒溼氣手臂痛。戴元禮曰片子薑黃能入手臂治痛。其兼理血中之氣可知。能治癥瘕癰疽。通經消腫毒。功力烈於鬱金。但血虛臂痛者服之。病必增劇。

鬱金

辛苦平無毒。本草以爲性寒。誤矣。安有辛香。

而寒之理。蜀產者體圓尾銳如蟬腹狀。發苗處有小孔。皮黃而帶黑。通身粗皺如梧桐子紋。每枚約重半錢。折開質堅色黃。中帶紫黑。嗅之微香不烈者真。若大小不等。色黃皮起細橫紋。有鬚如線。折之中空質柔。內外皆黃。其氣烈者卽片子薑黃也。體圓首尾相似。通身橫紋。發苗處無小孔。折開氣烈觸鼻者。染色薑黃中之小者也。蓬朮則大塊色青黑。最大者爲廣茂。與此不類。蘇恭不能分別。乃爲一物謬矣。

發明 鬱金辛香不烈。先升後降。入心及包絡。治吐

衄血唾血。血腥。破惡血。血淋尿血。婦人經脈逆行。
產後敗血衝心。及宿血心痛。並宜鬱金末。加薑汁。童
便同服。其血自清。痰中帶血者。加竹瀝。又鼻血上行
者。加入四物湯。一婦患失心風癲十年。用鬱金四兩。
佐明礬一兩。爲丸。硃砂爲衣。纔服五十九。心間如有
物脫去。再服而蘇。以鬱金入心去惡血。明礬化頑痰。
硃砂安神故也。又能化癥瘕爲水。嶺南蠱毒爲害。初
覺胸腹痛。卽用升麻。或膽礬吐之。若膈下急痛。以米
湯調鬱金末三錢服之。卽瀉出惡物。或合升麻鬱金。

服之不吐則下。此李巽岩爲雷州司理。鞠獄得此方。活人甚多。按以上諸治。其功皆在破宿生新。今世誤以爲諸血聖藥。病者不惜重費。醫者藉爲射利。咸以薑黃代充。爲害非淺。凡屬陰虛失血。及陰火迫血上逆。咸爲切禁。

蓬莪朮

卽蓬莪

苦辛溫無毒。入肝經。藥醋炒。入心脾

藥麪裏煨熟。入四物湯調經。羊血或雞血拌炒。

發明

蓬莪朮入肝破血。治婦人血氣結積。痛痰癖

冷氣。跌撲損痛。下血及內損惡血。通肝經聚血。蓋此

藥專破氣中之血也。按蓬蘽誠爲磨積之藥。但虛人得之。積不去而真已竭。更可虞也。須得參朮健運。補中寓瀉。乃得力耳。

荆三稜 苦平無毒。生荆楚地。故名荆三稜。真者絕少。今世所用。皆草三稜也。醋炒用之。

發明 三稜肝經氣分藥也。能破血中之氣。散血結。通肝經積血。主寒癖結塊。破產後惡血。血結腹痛。通月水。墮胎。以其力峻。故難久服。有人病癥瘕腹脹。用三稜莪朮酒煨煎服。下一黑物如魚而愈。按絜古云。

三稜能瀉真氣。虛者勿用。東垣破積諸方。皆與人參
贊助。如專用剋削。脾胃愈虛。不能運行。其積亢逆益
甚矣。

香附

即莎草根

辛微苦甘。平無毒。產金華。光細者佳。入

血分補虛。童便浸炒。調氣鹽水浸炒。行經絡酒浸炒。
消積聚醋浸炒。氣血不調。胸膈不利。則四者兼製。肥
盛多痰。薑汁浸炒。止崩漏血。便製炒黑。走表藥中。則
生用之。

發明 香附之氣平而不寒。香而能竄。乃足厥陰肝

手少陽三焦氣分主藥兼入衝脈開鬱氣消痰食散風寒行血氣止諸痛。月候不調胎產崩漏多怒多憂者之要藥。治兩脇氣妨心忪少氣是血中之氣藥也。蓋血不自行隨氣而行氣逆而鬱則血亦凝滯氣順則血亦隨之而和暢矣。生則上行胸膈外達皮毛故能散風寒。熟則下走肝腎外徹腰足故能調血氣。得參朮則益氣得歸地則調血得木香則流滯和中得沉香則升降諸氣得芎藭蒼朮則總解諸鬱得山梔黃連則降火清熱得茯苓則交心腎得茴香補骨脂。

則引氣歸元。得厚朴半夏則決壅消脹。得紫蘇葱白則解散邪氣。得三稜莪朮則消磨積塊。得艾葉則治血氣。煖子宮。乃氣病之總司。女科之主帥也。惟經水先期而淡。及失氣無聲無臭者。勿用。血氣本虛。更與利氣。則行之愈速矣。

茉莉花

辛熱無毒。根熱有毒。

發明 茉莉花古方罕用。近世白痢藥中用之。取其芳香散陳氣也。其根性熱有大毒。以酒磨一寸服。卽昏迷。一日乃醒。服二三寸。二三日醒。惟接骨脫臼用。

以傳之則不知痛也

排草香 辛溫無毒

發明 芳香之氣皆可辟臭去邪惡氣鬼魅邪精。天
行時氣並宜燒之。水煮洗水腫浮氣與生薑芥子煎
湯浴風癰効。

藿香 辛微溫無毒。廣產者良。但葉甚少。土人每以
排草葉僞充。最難辨別。須於莖上擇取色綠未經穢
壞者方効。

發明 藿香入手足太陰。芳香之氣助脾醒胃。故能

止嘔逆。開胃進食。溫中快氣。去瘴氣。止霍亂。治心腹
痛。凡時行疫癘。山嵐瘴癘。用此醒脾健胃。則邪氣自
無容而愈矣。但陰虛火旺。胃虛作嘔。內無留滯者。不
可用。恐反傷正氣。引邪內入。江浙土產者。伐胃消食。
其莖能耗氣。用者審之。

薰香

卽零
陵香

甘平無毒。廣產者良。雲陽產者氣濁。不

堪入藥。

發明 薰香辛散。上達。故心痛惡氣。齒痛鼻塞。皆用
之。單用治鼻中瘰肉。鼻鼾。香以養鼻也。多服作喘。爲

能耗散真氣也。

蘭香 辛溫無毒。菜部移此。瀕湖綱目。芳草部有蘭草。菜部有蘭香。名曰羅勒。種類不同。因攷正之。按蘭有三種。一種曰蘭草。其氣濃濁。卽今之省頭草也。一種曰蘭香。植之庭砌二十步內。卽聞香。俗名香草。以子能去目。腎故又名腎子草。一種名羅勒。莖葉較蘭香稍粗大。形雖極類。而氣葷濁。以嫩時可食。僅入菜部。不堪入藥。

本經利水道。殺蟲毒。辟不祥。久服益氣。輕身不老。通。

神明。

發明 蘭氣芳香。能辟疫毒惡氣。楚人以之爲佩。又能辟汗濕之氣。故名辟汗香。入手足太陰陽明。力能調中消食。去惡氣。治嘔嘔。脾痺。口中時時溢出甜味者。非此不除。按蘭性芳香辛溫。專走氣道。故能利水調肝和脾。其功倍於藿香。善調嘔逆。散積久陳鬱之氣。素問云。五味入口。藏於胃。以行其津氣。津液在脾。令人口甘。此肥美所發也。其氣上溢。轉爲消渴。治之以蘭。除陳氣也。東垣治消渴生津飲用蘭葉。蓋本

於此又治牙疼口臭有神功。九亦用蘭香云。如無以
藿香代之。近世有誤認幽蘭爲蘭香者。大可噴飯。觀
本經。利水殺蟲毒辟不祥之治。豈幽蘭能之乎。古方
治癘風。蘭香散。取其散肺胃中之溼熱蟲毒也。普濟
方治反胃。蘭香和甘蔗汁服之。錢氏治小兒鼻疳赤
爛。蘭葉燒灰二錢。銅絲半錢。輕粉二字爲末。日傅三
次卽愈。○子治目瞤及塵物入目。以三五顆內目中。
少頃其子溼脹與物俱出。又主暴得赤眼。後生翳膜。
用蘭香子一粒入眥內。閉目少頃。連膜俱出。蓋此子

得溼卽脹故能染惹。眵淚浮膜爾然目中不可著一塵。而此可納三五顆亦不妨礙。又小兒食肥甘口臭齒黑名曰崩砂。漸至齲爛名曰潰槽。又或出血名曰息露。重則齒落名曰腐根。用蘭香子末輕粉各一錢。蜜陀僧煨赤醋淬妍末半兩和勻。每以少許傅齒及齲上。內服甘露飲立効。○時珍曰蘭香須三月棗葉生時種之乃生。否則不生。常以魚腥水泥溝水冷泥水澆之。則香而茂。不宜糞水。著糞則萎。其子大如蚕而褐色不光。七月收之。種時防蟻。溼則有脂浮脹。須

以桴炭末掩之

澤蘭 苦甘微溫無毒取葉酒洗用

本經主金瘡癰腫瘡膿

發明 澤蘭入足太陰厥陰血分專治產後血敗流於腰股拘攣疼痛破宿血消癥瘕除水腫身面四肢浮腫本經主金瘡癰腫瘡膿皆取散血之功爲產科之要藥更以芎歸童便佐之功效勝於益母

馬蘭 辛平無毒赤莖者良

發明 馬蘭入陽明血分與澤蘭功用相近故能破

宿生新丹方治婦人淋濁痔漏有效。喉痺腫痛。以馬
蘭根葉搗汁。入米醋滴鼻孔。或灌喉中。取痰自開。絞
腸痧腹痛。以馬蘭細嚼嚥汁立安。水腫溺瀉。馬蘭一
握。黑豆小麥各一撮。酒水煎服。効。蛇傷。搗汁和醋搽
之。皆取散血解毒也。

香薷

辛微溫無毒。江西白花者良。

發明 香薷辛溫。先升後降。故熱服能發散暑邪。冷
飲則解熱利小便。治水甚捷。世醫治暑病。以香薷飲
爲首藥。然暑有乘涼飲冷。致陽氣爲陰邪所遏。遂病

發熱惡寒頭痛煩躁。口渴或吐或瀉。或霍亂者。宜用此發越陽氣散水和脾。若飲食不節。勞役作喪之人。傷暑發熱大渴。煩渴喘促者。乃勞倦內傷之證。必用清暑益氣。如大熱大渴。又宜人參白虎之類。以瀉火益元。更有汗出如雨。吐瀉脫元。四肢清冷。脈微欲脫者。又須大順漿水散等方救之。若用香薷飲。是重虛其表。頃刻脫亡矣。今人不知。槩用沉冷代茶。若元氣虛人服之。往往致病。蓋香薷乃夏月解表之藥。如冬月之用麻黃。氣虛者豈可漫用。深師香薷丸治通身。

水腫以香薷熬膏九白朮末日三夜一服米飲下之
効。

爵牀

俗名赤眼
老母草

鹹寒無毒

本經主腰脊痛不得措牀。俛仰艱難。除熱。可作湯浴。
發明 爵牀善通血脈。蘇恭言療血脹下氣。杖瘡搗
汁塗之。立瘥。觀本經諸品。不出活血舒筋之用也。
荊芥 又名
假蘇 辛微溫無毒。產後止血。童便制黑用。凡
食河豚及一切無鱗魚與驢肉俱忌之。食黃鱔魚後
服之。令人吐血。惟地漿可解。與蟹同食動風。

本經主寒熱鼠瘻癰癰生瘡破結聚氣下痢血除溼
疔。

發明 荊芥穗入手太陰足厥陰氣分其功長於祛
經絡中之風熱。觀本經所主皆是搜經中風熱痰血
之病。又能清頭目去瘀血破結氣消瘡毒。故風病血
病瘡病產後爲要藥。治風兼治血者。以其入風木之
藏。卽是藏血之地。故並主之。華元化治產後中風口
噤發瘧及血暈不醒。荊芥末三錢。豆淋酒調服。神効。
產後血暈熱童便調服。而表虛自汗陰虛面赤者禁。

用今人但遇風證槩用荆芥此流氣散之相沿耳

紫蘇

辛溫無毒葉紫者能散血脈之邪最良

發明

蘇葉味辛入氣分色紫入血分升中有降同

橘皮

砂仁則行氣安胎同藿香烏藥則快氣止痛同

麻黃葛根

則發汗解肌同芎藭當歸則和營散血同

木瓜厚朴

則散溼解暑同桔梗枳殼則利膈寬中同

杏仁葶子

則消痰定喘然不宜久服泄人真氣單用

煮汁解蟹毒

若脾胃虛寒人過服多致滑泄往往不

覺也其梗能行氣

安胎但力淺薄難於奏効亡血家

大虛及妊婦產婦發散用苞最佳本乎天者親上取其包含子氣且氣味皆薄而無過汗傷中之患也

蘇子 辛溫無毒粗而色深紫者真細而色淡者假發明 諸香皆燥惟蘇子獨潤爲虛勞欬嗽之專藥性能下氣故胸膈不利者宜之與橘紅同爲除喘定嗽消痰順氣之良劑但性主疎泄氣虛久嗽陰虛喘逆脾虛便滑者皆不可用

水蘇

一名雞蘇

辛溫無毒子名荏子

本經下氣殺穀除飲食辟口臭去邪毒辟惡氣

發明 水蘇卽蘇之野生色青者其氣芳香故本經所主一皆胃病專取芳香正氣之義局方用治血病者取以解散血中之氣也氣散則血亦散矣

薄荷 辛平無毒蘇產者良去梗用

發明 薄荷辛涼上升入肝肺二經辛能發散專於消風散熱涼能清利故治欬嗽失音頭痛頭風眼目口齒諸病利咽喉去舌胎小兒驚熱及瘰癧瘡疥爲要藥其性浮而上升爲藥中春升之令能開鬱散氣故逍遙散用之然所用不過二三分以其辛香伐氣

多服久服令人虛冷瘦弱人多服動消渴病陰虛發熱欬嗽自汗者勿施

隰草部

菊 黃者苦甘平白者苦辛平皆無毒野生者名苦薏可搗塗癰腫疔毒服之傷人腦

本經主諸風頭眩腫痛目欲脫淚出皮膚死肌惡風溼痺久服利血氣輕身耐老延年

發明 菊得金水之精英補水以制火益金以平水爲去風熱之要藥故本經專主頭目風熱諸病取其

味甘氣清有補陰養目之功。益益金則肝木平而風自息。補水則心火制而熱自除矣。其治惡風溼痺者以其能清利血脈之邪而痺溼得以開泄也。又黃者入金水陰分。白者入金水陽分。紫者入婦人血分。觀金匱侯氏黑散千金秦艽散俱用菊花爲君。時珍所謂治諸頭目其旨深矣。近有一種從番舶來六月開花。但有正黃而無間色。豈特黃州脫瓣爲異哉。

艾 苦辛溫無毒。蘄州者爲勝。

發明 艾性純陽。故可以取太陽真火。可以回垂絕。

元陽服之則走肝脾腎三陰而逐一切寒溼轉肅殺之氣爲融和。生用則性溫。炒熟則大熱。用以灸火則透諸經而治百病。蘇頌言其有毒誤矣。夫用藥以治病。中病則止。若素有虛寒。痼冷。婦人溼鬱帶漏之病。以艾和歸附諸藥治之。夫何不可。艾附丸調經而溫子宮。兼主心腹諸痛。膠艾湯治虛痢及胎妊產後下血。雷火鍼同丁香腐臍熨寒痺攣痛。若老人臍腹畏冷及寒溼脚氣。以熟艾入布兜之。惟陰虛火旺血燥生熱及宿有失血病者爲禁。有人患風瘙癢疹不時

熅發以絹裹擦之卽消亦取其辛散開發之力

茵陳蒿 苦平微寒無毒

本經主風溼寒熱邪氣熱結黃疸

發明 茵陳有二種一種葉細如青蒿者名綿茵陳專於利水爲溼熱黃癰要藥一種生子如鈴者名山茵陳又名角蒿其味辛苦小毒專於殺蟲治口齒瘡絕勝並入足太陽本經主風溼寒熱熱結黃癰溼伏陽明所生之病皆指綿茵陳而言仲景茵陳蒿湯以之爲君治溼熱發黃梔子檨皮湯以之爲佐治燥熱

發黃。如茵。澇則溼黃。旱則燥黃。其麻黃連。梔。赤小豆湯。以之爲使。治瘀熱在裏而身黃。此三方分治陽黃也。其治陰黃。則有茵陳附子湯。各隨燥溼寒熱而爲主治。按茵陳專走氣分而利溼熱。若畜血發黃。非此能治也。外臺治齒齲。宣露。千金治口瘡。齒蝕。並用燒灰塗之。有汁吐去。一宿卽効。而殺蟲方中。一味煎湯內服。外洗。皆用角蒿。專取逐溼化熱之功也。

青蒿。苦寒無毒。莖紫者真。根莖子葉不可並用。恐成痢疾。葉主溼熱。子治骨蒸。俱宜童便制用。

本經主疥癩癰痒惡瘡殺蟲留熱在骨節間明目
發明 青蒿亦有二種一種發於早春葉青如綿茵
陳專瀉丙丁之火能利水道與綿茵陳之性不甚相
遠一種盛於夏秋微黃如地膚子專司甲乙之令爲
少陽厥陰血分之藥故莖紫者爲良其治骨蒸勞熱
有殺蟲之功而不傷伐骨節中陽和之氣者以其得
春升之令最早也此與角蒿之性大都相類又能明
目善清在上之虛熱燒灰淋汁和石灰點治惡瘡息
肉蠱癰蘇恭生搗敷金瘡經驗方和桂心治寒瘡但

性偏苦寒。脾胃虛寒泄瀉者勿服。

茺蔚

俗名益母

辛甘微溫無毒。忌犯鐵器。其子微炒香。

蒸熟烈日曝燥。杵去殼用。

本經茺蔚子。明日益精。除水氣。莖治癰疹。可作浴湯。發明。茺蔚入手少陰足厥陰血分。活血行氣。有補陰之功。凡胎前產後。所恃者血氣也。胎前無滯。產後無虛。以其行中有補也。然所謂補者。是散其瘀而營血受蔭。非補養血氣之謂。丹方以益母之嫩葉陰乾。拌童便陳酒。九蒸九晒。入四物湯料爲丸。治產後諸

證。但功專行血。故崩漏下血。若脾胃不實。大腸不固者。勿用。爲其性下行也。近世治番痧腹痛嘔逆。用以濃煎。少加生蜜。放溫恣飲。有效。取其能散惡血也。其子能明目。功尚益精利水。水虧而瞳子收小者。宜之。若火盛瞳子散大者。切忌。爲其辛散。能助火邪也。白花者。名繫菜。嫩苗可食。故謂之菜。藏器主產後腹痛。今人治白帶。用一味爲末。服之大効。

薇銜 苦。溫。無毒。素問謂之麋銜。唐本曰鹿銜。千金曰鹿藥草。言鹿有疾銜此草卽瘥也。其葉大而面

緣背紫者爲真。蘇恭言有大小二種。保昇言葉似荒蔚。叢生有毛者吳風草也。

本經主風溼痺歷節痛。驚癇吐血。悸氣賊風。鼠瘻癰腫。

發明 鹿銜本經專主風溼痺歷節痛。素問同澤木治酒風身熱懈惰。汗出如浴。惡風少氣之病。亦取其能除痺著血脈之風溼也。又治驚癇悸氣吐咯諸血。以其能走胃與腎肝血分。專理血中邪溼而無留滯之患。近世治吐血咯血用之。以其能溫補衝督之精。

血也。陝人名爲鹿胞草。言鹿食此卽能成胎。其性溫補下元。可知。今吳興山中。間亦產此。每於初夏。羣鹿引子銜食。乃去。洵爲確真無疑。采得。曬乾。一味浸酒。最爲有益。但性專助陽。力能走散陰精。故藏器云。婦人服之。絕產無子。良有見乎此也。其子名延壽果。味微澹而甘。惟秦地有之。不特有益於老人。而嬰兒先天不足者。尤爲上藥。惜乎南方罕得也。

夏枯草

苦辛溫無毒

本經主寒熱瘰癧鼠瘻頭瘡破癥散癥結氣脚腫溼

痺輕身

發明 夏枯草本經專治寒熱瘰癧有補養厥陰血脈之功以辛能散結苦能除熱而癥結癭氣散矣言輕身者脚腫溼痺愈而無重著之患也佐以香附甘草治日珠疼夜甚者以其稟純陽之氣而散陰中結滯之熱也又能解內熱緩肝火從治之法并治痘後餘毒及肝熱目赤有效久服亦防傷胃以善走厥陰助肝木之氣耳

劉寄奴 苦溫無毒

發明 劉寄奴破血下脹又能止血故產後餘疾及
金瘡血大小便血皆用之千金方治折傷瘀血用劉
寄奴骨碎補延胡索水煎加童便服集簡方治大小
便血劉寄奴末空心茶清調服衛生易簡方治血氣
脹滿劉寄奴紅酒煎服時珍治小兒尿血取劉寄奴
研末服効丹方治大便血用劉寄奴半兩臘茶一錢
烏梅半枚煎服卽効但性走散不可過服令人吐利

旋復花

本經名
金沸草

鹹甘溫小毒

本經主結氣脇下滿驚悸除水去五藏間寒熱補中

下氣

發明 旋復花升而能降。肺與大腸藥也。其功在於
開結下氣。行水消痰。治驚悸。祛痞堅。除寒熱。散風溼。
開胃氣。止嘔逆。除噫氣。故肺中伏飲。寒嗽宜之。仲景
治傷寒汗下後。心下痞堅。噫氣不除。有旋復代赭石
湯。金匱半產漏下有旋復花湯。胡洽治痰飲在兩脇。
張滿有旋復花湯。皆取其能下氣也。但性專溫散。故
陰虛勞嗽。風熱燥欬。不可誤用。用之嗽必愈甚。本經
言補中下氣者。甘能緩中。鹹能潤下。痰氣下而中氣

安脇下滿結寒熱驚悸水氣皆除矣

青箱

即雞冠花

苦微寒無毒

本經主邪氣皮膚中熱風瘙身癢殺三蟲子治屑口青

發明 青箱子治風熱目疾與決明子同功本經雖不言治目疾而主屑口青爲足厥陰經藥其明目之功可推其治風瘙身癢皮膚中熱以能散厥陰經中血脈之風熱也

紅藍花

即紅花

辛溫無毒

發明 血生於心包藏於肝屬於衝任紅花汁與之
同類故能行男子血脈通婦人經水活血解痘毒散
赤腫產後血暈及胎死腹中並宜和童便服之少則
養血多則行血過用使人血行不止且性兼上行不
可不知亦主蠱毒下血堪作臙脂治小兒疳耳解痘
疥毒腫產後血悶以紅花十觔煮湯盛桶置於橫格
之下昇婦寢上薰之湯冷再加半日乃穌

臙脂 甘平無毒臙脂有四種一種以紅藍花汁染
胡粉而成一種以山燕脂花汁染粉而成一種以山

榴花汁作成者一種以紫鉚汁染綿而成皆可入血
病藥用又落葵子亦可取汁和粉而成可作面脂不
入藥川紫鉚查名火漆匠工補木用之

發明 臙脂色紅竝可爲活血之藥其治痘瘡肌肉
結硬用綿胭脂同紫草煎湯乘熱頻將臙脂擦之漸
軟卽能發出又痘瘡護眼黃藥膏用油胭脂調塗則
痘無入眼之患

大薊小薊 花甘溫根微涼無毒

發明 大薊小薊皆能破血大薊根主女子赤白沃

下止吐血鼻衄涼而能行行而帶補兼療癰腫小瘰
根專於破血不能消腫有破宿生新之功吐血血崩
之用但其力微只可退熱不似大劑能破瘀散毒也
丹方治吐血不止用小劑山楂生地一服卽止止中
寓瀉劫劑中之良法近世醫師咸用其花總取散血
之義然其性皆下行故脾胃虛弱泄瀉少食者忌用
續斷本經名屬折別錄名接骨苦微溫無毒去根尾酒炒用
本經主傷中補不足金瘡癰瘍折跌續筋骨婦人乳
難久服益氣力

發明 續斷入肝。主續筋骨。爲婦人胎產崩漏之首藥。又主帶脈爲病。久服益氣力。利關節。治腰痛。煖子宮。療金瘡折傷。散癰腫瘀血。療婦人乳難。本經治傷中補不足等病。總取和血通經之義。又能止小便多。治遺泄。古方血痢。用平胃散一兩。續斷三錢爲末。每服三錢。水煎服。卽愈。寧無顧名思義之實乎。

漏蘆

本經名野蘭

苦鹹寒有毒

本經主皮膚熱毒惡瘡疽痔漏痺下乳汁。

發明

漏蘆苦寒解毒。乃足陽明經藥。本經治熱毒。

惡瘡下乳汁。以其能利竅也。爲消毒排膿殺蟲要藥。古方治癰疽發背。以漏蘆湯爲首稱。蓋鹹能軟堅寒能解毒。故服之必大便作瀉。使邪從下而出也。昔人治瘦兒瘡毒。令母服此。使藥性從乳中過之。每致乳子利下白沫。大損元氣。故氣虛及瘡瘍不起發者。咸非所宜。而妊婦尤爲切禁。

葶藶黃蘆 甘寒無毒

發明 葶藶能行滯血。產婦枕之。治血暈。產後腹痛。以葶安腹上。卽止。漬葶水療熱渴。葶根治小兒赤丹。

○其黃蘗苦溫專散陳久瘀血取陳年者燒灰存性酒調服之。絡麻根燒灰治鎖喉風神効。

胡蘆巴

苦大溫無毒

發明 胡蘆巴乃海外胡蘿蔔子。聲音相近之謠耳。右腎命門藥也。元陽不足。冷氣潛伏。不得歸元者。宜之。小腸奔豚偏墜。及小腹有形如卵。上下走痛。不可忍者。用胡蘆巴丸。腎氣不歸。上熱下寒。厥逆嘔吐者。用黑錫丹。皆與金鈴子一寒一熱同用。其導火歸元之功可知。

惡實

又名鼠粘子牛蒡子大力子皆別名也

辛平無毒

發明

鼠粘子肺經藥也治風溼癰疹咽喉風熱散

諸腫瘡瘍之毒痘疹之仙藥也痘不起發用此爲末刺雄雞冠血和酒釀調胡荽湯下神効瘡瘍毒盛生研用之卽出瘡頭酒炒上行能通十二經去皮膚風消癰疹毒惟氣虛色白大便利者不宜

蒼耳

古名菜耳

實甘溫葉苦辛小毒酒浸炒用忌猪肉

發明

蒼耳治頭風腦痛風溼周痺四肢拘攣惡肉

死肌皮膚瘙癢脚膝寒痛久服亦能益氣其葉久服

去風溼有效。服蒼耳人最忌豬肉及風邪觸犯。則遍身發出赤丹也。婦人血風攻腦。頭旋悶絕。忽倒不知人事者。用蒼耳草嫩心陰乾爲末。酒服甚效。此味善通頂門連腦。能走督脈也。

天名精

本經名蝦蟇藍一名地菰子名鶴蝩

甘寒無毒

本經主瘀血血癥欲死下血止血利小便。

發明

天名精功專散血有破宿生新之功故本經

言下血止血又能涌吐風痰殺蟲解毒搗汁服之能止痰瘧漱之止牙疼搗之敷蛇傷煎服除淫穢邪毒。

從小便泄出。凡乳蛾喉嚨腫痛。及小兒急慢驚風。牙關緊急。不省人事者。搗絞和酒灌之。咽喉腫塞痰涎壅滯。搗汁鵝翎掃入去痰立効。亦治豬瘟。

鶴蝨 苦平無毒

發明 鶴蝨入厥陰肝經。善調逆氣。能治一身痰凝氣滯。殺蟲方中最要藥。錄驗方療虻攻心痛一味丸服。小兒蟲痛亦單用鶴蝨研末。肥肉汁服。其蟲自下。藥肆每以胡蘆蔔子代充。不可不辯。

稀莨 辛苦寒小毒。採葉陰乾。入甌中層層洒酒。與

蜜九蒸九晒用。

發明 稀莢苦寒。畧兼微辛。故有小毒。爲祛風除濕。而兼活血之要藥。稀莢丸治風濕四肢麻痺。骨節冷痛。腰膝無力。甚効。但脾腎兩虛。陰血不足。而腰膝無力。骨痛麻痺者。大非所宜。時珍曰。生搗汁服。則令人吐。故云有小毒。九蒸九晒。則去風痺。故云無毒。或云甚益元氣。不稽之言也。生者搗服。能吐風痰。其能傷胃可知。

箒 甘寒無毒

發明 箬生小竹而葉最大。故可以之爲筴。燒灰治吐衄嘔咯及便溺諸血。又能通小便利肺氣。散喉痺。消癰腫。每服不過一錢七。又治痘瘡倒靨。以箬葉灰一錢七入麝香酒調服之。乾箬葉煎湯治胃熱呃逆。其性較柿蒂稍平。取灰以香油調塗湯火傷甚良。

蘆根

笋名蘆蘆葦名葦華花名蓬蘽

甘寒無毒

發明 蘆根甘寒。主消渴。胃中客熱。利小便。治噎噦反胃。嘔逆不下食。妊娠心熱。時疫寒熱煩悶。解河豚諸魚毒。其笋尤良。○蘆蘆治臍下堅癖。小便不利。○

莖莖中空。專於利竅。善治肺癰吐膿血臭痰。千金葦
莖湯以之爲君。服之熱毒從小便泄去最捷。蘆花煮
汁治乾霍亂。心腹脹痛。箬燒存性治吐衄諸血。

甘蔗

卽芭蕉

甘大寒無毒

發明 甘蔗性寒。治天行狂熱。解消渴煩悶。利小便。
治溼熱黃痺。和酒服療癰腫。并以滓塗腫處。良小兒
遊風。卧蕉葉上卽愈。治火燙。以筋插入。出筋瓶盛。取
油塗之。別錄治癰疽結熱。肘後治發背腫毒。聖惠治
血淋瀝痛。蘇頌治風癰。欲倒飲之。取吐効。惟陰疽不

赤腫者禁用

蘘荷

卽芭蕉之
色白者

辛溫有小毒忌鐵

發明 蘘荷有毒而能攻毒爲主蠱之最中蠱者服
蘘荷汁并卧葉上卽能呼出蠱主姓名其治喉舌瘡
爛婦人月閉及傷寒時氣壯熱頭痛口瘡用之皆取
其辛散也

麻黃 苦溫無毒去根節湯泡去沫服乾用若連根
節用令人汗不絕其根專能止汗

本經主中風傷寒頭痛溫瘧發表出汗去邪熱氣止

欬逆上氣除寒熱破癥堅積聚

發明 麻黃微苦而溫中空而浮陽也升也入足太陽其經循背下行本屬寒水而又受外寒故宜發汗去皮毛氣分寒邪以泄寒實若過發則汗多亡陽或飲食勞倦及雜病自汗表虛之證用之則脫人元氣禍患莫測麻黃治衛實之藥桂枝治衛虛之藥二物雖爲太陽經藥其實營衛藥也心主營血肺主衛氣故麻黃爲手太陰肺經之劑桂枝爲手少陰心經之劑傷寒傷風而欬嗽用麻黃湯桂枝湯卽湯液之源

也麻黃乃肺經之專藥故治肺病多用之仲景治傷寒無汗用麻黃湯有汗用桂枝湯夫津液爲汗汗卽血也在營卽爲血在衛卽爲汗寒傷營營血不能外通於衛衛氣閉固故無汗發熱而惡寒風傷衛衛氣不能內護於營營氣不固故有汗發熱而惡風是證雖屬太陽而肺實受邪氣蓋皮毛外閉邪熱內攻肺氣拂鬱故用麻黃甘草同桂枝引出營分之邪達之肌表佐以杏仁泄肺而利氣是麻黃湯雖太陽發汗重劑實爲發散肺經邪鬱之藥也腠理不密則津液

外泄而肺氣自虛。虛則補其母。故用桂枝同甘草。外散風邪以救表。內伐肝木以防脾。佐以芍藥泄木而固脾。皆是脾肺之藥。是則桂枝雖太陽解肌輕劑。實爲理脾救肺之藥也。又少陰證發熱脈沉。有麻黃附子細辛湯。少陰與太陽爲表裡。所謂熟附配麻黃。補中有發也。本經治中風。是主緩風癱瘓而言。云溫瘧係溼瘧。乃傳寫之誤。破癥堅積聚者。表裡兼治。非神而明之。難效其法也。

木賊

甘微苦無毒去節用

發明 木賊與麻黃同形同性故能發汗解肌升散火鬱風溼專主眼目風熱暴瞤止淚取發散肝肺風邪也多用人目腫若久瞤及血虛者又非所宜而傷暑或暴怒赤腫亦勿用之

石龍芻

一名龍鬚
卽席草

苦微寒無毒

本經主心腹邪氣小便不利淋閉風溼鬼疰

發明 龍芻生水中性專利水本經所主心腹邪氣亦是因水溼滯積所致其敗席治淋及小便不通昔人用以煮服莫若燒灰酒服更

燈心草

甘寒無毒欲入丸劑梗米飲漿磨之

發明

燈心輕虛甘淡故能瀉肺利水治急喉痺燒

灰吹之又燒灰塗乳上飼小兒止夜啼燒灰入輕粉

麝香治陰疳

生地黃

本經名地髓
又名羊音戶

甘苦寒無毒禁犯鐵忌萊菔

諸血採得鮮者卽用爲生地黃炙焙乾收者爲乾地黃以法制過者爲熟地黃

本經主傷中逐血痺填骨髓長肌肉作湯除寒熱積聚療折跌傷筋久服輕身不老生者尤良

發明 生地黃性稟至陰功專散血入手足少陰厥陰兼行足太陰手太陽錢仲陽導赤散與本通同用。馮丙丁之火別錄治婦人崩中血不止及產後血上薄心胎動下血鼻衄吐血皆擣汁飲之以其能散血消瘀解煩也其治跌撲損傷面目青腫以生地黃搗爛罨之卽消此卽本經治傷中血痺折跌筋傷等證之義蓋肝藏血而主筋肝無留滯則營血調而傷中自愈筋無邪著則三氣通而血痺自除作湯除寒熱積聚者血和則結散而諸證平矣其曰填骨髓長肌

肉者邪無著而形神自復也。昔人治心痛以鮮地黃汁作冷淘食之。取吐不吐則利出長蟲。如辟宮而安。此卽本經除寒熱積聚之驗。其於服食方中用之。取以輔助諸藥。辟除三蟲。使從幽門化出也。因思千金靈飛散中。生地黃急不可得鮮者。咸取乾者應用。乃知本經末後續出生者尤良一語。見古聖之苦心。無所不用其極也。愚按生地黃與乾地黃功用不同。豈可混論。按徐之才別錄云。生地黃乃新掘之鮮者爲散。血之專藥。觀本經主治皆指鮮者而言。祇緣諸家

本草從未明言且產處遼遠藥肆僅有乾者鮮者絕
不可得是不能無混用之失易知乾地黃既經炙焙
力能止血安有傷中血痺折跌筋傷等治乎至於傷
中日久積聚內形寒熱外顯並宜鮮者作湯統領他
藥共襄破宿生新之功設混用乾者則瘀傷愈結安
望其有髓充肉長之勛乎予嘗綜覽諸方凡藥之未
經火者性皆行散已經炙焙性皆守中不獨地黃爲
然也

乾地黃 苦微甘寒無毒產懷慶者丁頭鼠尾皮粗

質堅每株重七八錢者力優產亳州者頭尾俱粗皮細質柔形雖長大而力薄產江浙者細軟無力僅可清熱不入補劑無問產於何地但枯槁質輕者謂之天黃不堪入湯藥。

發明 乾地黃心紫通心中黃入脾皮黑歸腎味厚氣薄內專涼血滋陰外潤皮膚索澤病人虛而有熱者宜加用之戴元禮曰陰微陽盛相火熾強來乘陰位日漸煎熬陰虛火旺之證宜生地黃以滋陰退陽同人參茯苓石蜜名瑤玉膏治虛勞欬嗽唾血同天

麥門冬熟地人參名固本丸治老人精血枯槁於固
本丸中加枸杞熬膏名集靈膏治虛羸喘嗽乏力其
瑤玉膏雖用鮮者搗汁桑火熬膏散中寓止與乾者
無異固本丸集靈膏並用乾者而集靈變丸作膏較
之固本差勝易簡方曰男子多陰虛宜熟地黃女子
多血熱宜生地黃虞搏云生地黃涼血而胃氣弱者
恐妨食熟地黃補血而痰飲多者恐泥膈或言生地
黃酒炒則不妨胃熟地黃薑制則不泥膈然須詳病
人元氣病氣之淺深而用之若產後惡食泄瀉小腹

結痛虛勞脾胃薄弱大便不實胸腹多痰氣道不利
升降窒塞者咸須遠之浙產者專於涼血潤燥病人
元氣本虧因熱邪閉結而舌乾焦黑大小便秘不勝
攻下者用此於清熱藥中通其秘結最妙以其有潤
燥之功而無滋潤之患也愚按本經地黃雖列上品
而實性稟陰柔與鄉愿不異譬諸宵人內藏隱隙外
示優容是以舉世名家靡不藉爲滋陰上藥止血神
丹雖或用非其宜得以稍清旺氣服之仍得暫安非
若人參之性稟陽明象類君子苟有過人皆知之是

以師家斂手不敢用。病家緘口不敢嘗。直至濱危。不得已而用之。每至下咽卽斃。是以左右之人靡不交口歸咎於人參。曷知其爲從前悞藥所致。夫藥之遺患於病。比比有之。莫如地黃。門冬之屬。陰柔最甚。至死不覺其非。故不憚質屑。特表而出之。

熟地黃 甘溫無毒。製地黃法。擇取原株重六七錢者。以好酒浸入。縮砂仁末拌。水甑瓦鍋。九蒸九晒。得太陽真火入劑。方始得力。蓋地黃性泥。得砂仁之香。竄而通調五藏。冲和之氣。歸宿丹田也。

發明 熟地黃假火力蒸晒轉苦爲甘爲陰中之陽故能補腎中元氣。必須蒸晒多次得太陽真火確有坎離交濟之妙用。若但煮熟不加蒸曝雖服奚益。如古曰生地黃治心熱手心熱益腎水涼心血其脈洪實者宜之。若脈虛者則宜熟地黃錢氏六味丸以之爲君。天一所生之源也。若命門真火素弱者必須崔氏八味丸得桂附共襄之力方得陰陽兼濟之功。湯液四物湯以之爲主。乙癸同源之治也。其功專於填骨髓長肌肉生精血補五藏內傷不足通血脈利耳。

目黑鬚髮。男子五勞七傷。女子傷中。胞漏下血。經候不調。胎產百病。滋腎水真陰。療臍腹急痛。病後脛股痠痛。坐而欲起。目眈眈如無所見。蓋臍下痛屬腎藏。精傷脛股痠係下元不足。目眈眈如無所見。乃水虧不能鑒物。皆腎所主之病。非熟地黃不除。今人治目腎內障。往往用六味丸。配磁硃丸服。良非所宜。地黃禁鐵磁爲鐵之母。安得不忘。予嘗用當歸代地黃。借其辛溫。以助熾發之勢。火盛則用芍藥代山茱萸。借其酸寒。以收耗散之陰。藥雖異而功不殊也。愚按地

黃本手少陰經藥功專清熱散血非經蒸曝不能入足少陰經得水火既濟之功轉苦成甘變紫爲黑故直入腎藏填補真陰兼培黃庭后土土厚載物諸藏皆受其蔭是以崔氏八味錢氏六味爲培養真陰真陽之總司後人藉此各隨所稟之偏而爲增減無往非受其益如陰氣不固則加鯢膠菟藜陽氣不充則加鹿茸河車中氣不舒則加沉香縮砂下氣不吸則加牛膝車前上氣不津則加門冬五味肝氣內盛則減莖倍澤精氣下脫則減澤倍莖各得補偏救弊之

妙用。其陰火旺者。加知藥於六味方中。此與煬酒止渴無異。他如四物湯中之芎歸。卽六味丸中山萸之義。十全大補中之蒼桂。則八味丸中桂附之義。方得陰陽相濟之妙用。須知八味十全。平調血氣。且湯液性味易過。地黃與參並用。畧無妨礙。六味丸中切不可雜一味。中焦藥。如人參白朮甘草之類。咸非所宜。昔人有以六味丸加參而服。下咽少頃。輒作迷迷不爽。或令增麥冬五味。功力倍常。深得金水相生之妙用。非專工藥性者。之可與討論也。

牛膝

本經名百倍

苦酸平無毒懷產者畏而無傍疑水

道瀋滲者宜之。川產者細而微黑精氣不固者宜之。

忌牛肉。

本經主寒溼痿痺四肢拘攣膝痛不可屈伸逐血氣傷熱火爛墮胎。

發明 牛膝氣薄味厚性沉降泄乃足厥陰之藥。本經專主寒溼痿痺四肢拘攣等病。不及補養下元之功。豈聖法有所未盡歟。丹溪言牛膝能引諸藥下行筋骨痛風在下者宜加用之。其性雖下行走筋然滑

利之品。精氣不固者。終非所宜。得酒蒸則能養筋生
用。則去惡血。其治腰膝痛。不可屈伸。足痿之病。非取
其養血營筋之力歟。其治癰腫惡瘡。金瘡折傷。尿血
淋痛。婦人經秘不通。非取其活血破瘀之力歟。外臺
以生牛膝一味濃煎。治積久勞瘡。肘後以二觔浸酒。
治卒暴癰疾。延年以之同葵子煎服。下胞衣。衛生以
之搗菴折傷。梅師以之搗塗。金瘡千金以之搗敷。毒
腫。集驗以之通利溺閉。皆取其性滑利。瘀消血解毒
之功。雖強陰強筋。而氣虛下陷。大便秘澀。夢泄遺精。

妊娠崩漏俱禁用。惟川者性味形質與續斷彷彿。庶無精滑之虞。蓋腎司閉藏。肝司疏泄。此味專司疏泄。而無固蟄之功。世俗妄謂益腎而培養下元。藥中往往用之。與延盜入室何異。其土牛膝亦能解毒利竅。專治血鼓。一味濃煎。恣意服之。又鎖喉風諸治。不效。以土牛膝和醋搗絞取汁。蘸雞翎探吐稠痰。不過二三次神驗。

紫苑

白者名女苑

苦辛微溫無毒。或酒洗或蜜水炒用。

本經主欬逆上氣。胸中寒熱結氣。去蠱毒痰。安五

藏○女苑治風寒洗洗霍亂泄利腸鳴上下無常處驚癇寒熱百病

發明 紫苑肺經血分之藥本經止欬逆上氣胸中寒熱結氣取性疏利肺經血氣也去蠱毒痿躄者以其辛苦微溫能散結降氣蠱毒自不能留痿躄由肺熱葉焦紫苑專通肺氣使熱從洩便去耳別錄療欬唾膿血大明消痰止渴皆滋肺經血氣之効金匱澤漆湯用以治欬而脈沉者欬屬肺脈沉則血分之病也亦治下痢肺痛與紫參同功其性辛而不燥潤而

不寒補而不滯。善調五勞體虛。止嗽定喘。療驚悸吐衄諸血。又能通調水道。故溺清便血。單服一兩卽効。然大泄肺氣。陰虛肺熱。乾欬禁用。以其性專溫散。而無培養之力也。○白者曰女苑。大泄肺氣。本經主風寒洗洗。霍亂洩利。腸鳴上下無常處。驚癇寒熱百病。一皆氣分受傷之病。肘後方治人面黑。令白方。用女苑三分。鉛丹一分。爲末。醋漿服。一刀圭。日進三服。十日大便黑。二十一日面白。便止。過用則太白矣。千金方用酒服。男十日。女二十日。黑色皆從大便去。三十

歲後不可服。以肺氣漸減。不可復洩也。

麥門冬

本作
麥冬

甘寒無毒。去心用。卽不煩心。

本經主心胸結氣。腹中傷飽。胃絡脈絕。羸瘦短氣。久服輕身。不老不饑。

發明

麥門冬陽中微陰。入心肺腎及足陽明之經。

定心熱驚煩。療肺痿吐膿。蓋專泄而不專收。寒多人禁服。肺中伏火。脈氣欲絕者。加五味子。人參爲生脈散。專補脈中元氣不足。東垣云。六七月間。溼熱方盛。人病骨乏無力。身重氣短。頭旋眼黑。甚則痿軟。故孫

真人以生脈散補其天元真氣脈者人之元氣也人
參之甘溫瀉陰火而益元氣麥門冬甘寒滋燥金而
清水源五味子之酸鹹瀉內火而補庚金兼益五藏
之氣也時珍曰麥門冬以地黃爲使服之令人頭不
白添精補髓通腎氣定喘促令人肌體滑澤本經主
心胸結氣腹中傷飽胃絡脈絕羸瘦短氣一氣貫下
言因過飽傷胃而致心胸氣結脈絕不通羸瘦短氣
故宜以此滋其津液通其肺胃殊非開豁痰氣消尅
飲食之謂其陰虛羸瘦喘欬上氣失音失血及風熱

暴嗽咸非所宜。恐寒鬱熱邪牢不可破。冬成虛損之疾。痲疹欬嗽。不可誤用。以其性寒助陰。固斂陽邪。不能發越也。凡脾胃虛寒泄瀉。及痘瘡虛寒作瀉。產後血虛瀉。皆非所宜。

萱草

一名宜男
一名忘憂

甘平無毒

發明 萱性下走入陰。故根治沙石淋。下水氣。及酒痺大熱。衄血。搗酒服。治吹乳腫痛。○花治酒痺利溼。熱其花起屑者有毒。勿食。

淡竹葉

甘寒無毒

發明 淡竹隰生嫩苗葉綠花碧根鬚結子與竹絕
然不同性專淡滲下降故能去煩熱清心利小便根
能墮胎催生

冬葵子

向日葵子也

甘寒滑無毒

本經主五藏六府寒熱羸瘦破五癰利小便

發明

向日葵質堅耐寒入冬不凋故名冬葵性滑

利竅能治藏府寒熱羸瘦破五淋利小便婦人乳房
脹痛同砂仁等分爲末熱酒服三錢其腫卽消孕婦
難產不下專取一味炒香爲末芎歸湯下三錢則易

生取晨暮轉動靈活耳。夏子益奇疾方云有人手足忽長倒生肉刺如錐痛不可忍。但食葵菜卽愈。亦取其寒滑利竅之用也。

蜀葵

甘寒滑無毒

發明 葵以蜀中最勝。種類最多。其子入藥皆性滑利竅。能潤氣血之燥。千金稱其除客熱利腸胃。是言其藥也。東垣取其花之白者治白帶。赤者治赤帶。隨其色而爲所用。被狗齧者食之瘡永不瘥。

秋葵子

甘寒滑無毒

發明 葵色種種。惟花於秋者獨稟金氣而色黃。其子性專潤下。治小便淋及催生用之。與向日葵不殊。其花消癰腫。浸油塗湯火傷。其痛即止。

龍葵

即老鴉眼睛草

苦微甘滑寒無毒

發明 龍葵性滑如葵。言苗葉也。消熱散血。壓丹石毒。去婦人敗血。老鴉眼睛言其子也。善能續筋消疔。腫與苗葉不異。根利小便。與木通煎服効。

酸漿

一名燈籠草
俗名掛金燈

苦寒無毒

本經主熱煩滿。定志益氣。利水道。

發明 酸漿利溼除熱。清肺治欬。化痰痰熱去而志
定氣和矣。又主咽喉腫痛。蓋此草治熱痰欬嗽。佛耳
草治寒痰欬嗽。故其主治各有專司也。

敗醬草

一名苦菜。又名鹿腸。根作敗醬氣故名。

苦平無毒

本經主暴熱火瘡赤氣。疥癬疽痔。馬鞍熱氣。

發明 敗醬乃手陽明厥陰藥。善除暴熱火瘡。皆取
苦寒散毒之用。其治疽痔。馬鞍熱氣。以其性專下泄
也。金匱慈黃附子敗漿散。治腸癰固結未潰。故取薏
苡下達。敗醬苦降。附子開結而為熱因熱用之嚮道。

深得本經之旨。若膿成熱毒勢脹。不可用也。而婦人下部疽蝕。方中亦恆用之。近世醫師罕有識者。惟薇人採取笮乾。口苦笮菜。惜乎不知治療之功用也。欬冬花。辛溫無毒。紫色有白絲者真。蜜水拌微炒。本經主欬逆上氣。善喘喉痺。諸驚癇寒熱邪氣。發明。欬冬味辛入氣分。色紫歸血分。雖其性溫。却不燥血。故能輕揚上達。觀本經主治。一皆氣升火炎之病。古方用爲溫肺治嗽之要藥。潤肺消痰止嗽定喘。喉痺喉瘡。肺痿肺癰。咸宜用之。有人病欬多日。或

令燃欵冬花三兩放無風處以管吸其烟嚙之數日
果愈。娶寡失合陰虛勞嗽禁用以其性溫也。

鼠麴草

即鼠耳草又名佛耳草

甘平無毒

發明 別錄鼠耳主寒痺寒熱欵嗽東垣佛耳治寒
嗽及痰除肺中寒大升肺氣日華云大抵寒嗽多是
火鬱於內寒覆於外故佛耳欵冬爲之必用宣明透
脂散治寒鬱肺絡之嗽用佛耳欵冬鍾乳雄黃爲末
並於爐中燒以筒吸烟嚙下有涎卽吐去屢効。

決明子 鹹平無毒別錄云苦甘微寒無毒炒研用

本經主青盲目。淫膚赤白膜。眼赤痛淚出。久服益精
光輕身。

發明 相感志言園中種決明。蛇不敢入。丹溪言決
明解蛇毒。本此人藥。明目。本經治青盲目。淫眼赤淚
出。取其苦寒清熱也。以水調末塗腫毒。貼心止鼻衄。
燭太陽穴治頭疼。作枕治頭風。別錄療口青。是主肝
經畜熱之驗也。不宜久服。久服令人患風。代肝搜風
太過。反招風熱也。本經言久服益精光輕身。是指目
疾人肝熱內滯者而言。若肝虛血弱者。過用虛風內

擾在所必致耳

地膚子

一名落蒂
又名黃蒿

甘寒無毒。

本經主膀胱熱利小便補中益氣久服耳目聰明輕身不老。

發明 衆病皆起於虛虛而多熱則小便不利精氣日燔故本經主以清利膀胱邪熱中氣自復耳目聰明矣其能祛熱利小便去陰火治客熱丹腫葉主老人夏秋間熱淋用此搗自然汁服之卽通男子白濁用地膚子白歛爲丸滾湯下婦人白帶地膚子爲末

熱酒服之屢効。○苗葉燒灰煎霜制硃石粉霜水銀
硫黃雄黃礬砂毒。

瞿麥

苦寒無毒

本經主關格諸癰結小便不通。出刺決癰腫。明目去
腎破胎墮子下閉血。

發明 瞿麥利小便爲君主之用。故本經專主關格
諸癰結小便不通。金匱方治小便不利有水氣其人
苦渴者用栝蒌瞿麥丸。古方通心經利小腸爲最要
藥。若心經雖有熱而小腸虛者服之則心熱未退而

小腸別作病矣。以其降泄太過也。本經又言出刺。取鮮者。搗塗竹木刺也。破胎墮子。下閉血。皆利竅所致。故妊娠產後。小水不利。及脾虛水腫。禁用。以性專泄氣也。

王不留行

卽剪金花俗名金盞銀臺

苦甘平無毒

發明 王不留行專行血分。乃陽明厥陰衝任之藥。能通乳利竅。其性走而不守。故妊婦禁服。一婦患淋。卧久。用此煎服。再劑而愈。其利小便。出竹木刺。與瞿麥同功。

葶藶

辛苦寒小毒。酒淨焙用。療實水滿急生用。

本經主癥瘕積聚結氣。飲食寒熱破堅逐邪。通利水道。

發明 葶藶苦寒不減硝黃專泄肺中之氣。亦入手

陽明足太陽故仲景瀉肺湯用之。肺氣壅塞則膀胱之氣化不通。譬之水注上竅閉則下竅不通。水溼泛溢爲喘滿。爲腫脹。爲積聚。種種諸病生矣。辛能散苦能泄。大寒沉降能下行逐水。故能療本經諸病。亦能泄大便爲其體輕性沉降。引領肺氣下走大腸。又主

肺癰喘逆。痰氣結聚。通身水氣。脾胃虛者。宜遠之大戟去水。葶藶愈脹。用之不節。反乃成病。葶藶有甘苦二種。緩急不同。大抵甜者下泄性緩。雖泄肺而不傷胃。苦者下泄之性急。既泄肺而復傷胃。故以大棗輔之。然肺之水氣。臍滿急者。非此不能除。但水去則止。不可過劑。金匱方云。葶藶傳頭瘡。藥氣入腦。殺人。車前子。甘鹹寒。無毒。酒浸焙用。

本經主氣癰。止痛。利水道。除溼痺。久服輕身耐老。發明。車前子入足太陽少陰。能利小便。而不走氣。

與茯苓同功。本經治氣癰止痛通腎氣也。小便利則溼去。溼去則痺除。別錄治女子淋瀝等病。專取清熱利竅之功也。男女陰中有二竅。一竅通精。一竅通水。二竅不兼開。水竅得氣化乃出。精竅得火動乃泄。車前專通氣化行水道。疏利膀胱溼熱。不致擾動真火。而精氣寧謐矣。故凡瀉利暴下病。小便不利而痛者。用車前子爲末。米飲服二錢。利水道分清濁而穀藏止矣。又治目疾。水輪不清。取其降火而不傷腎也。時珍用以導小腸熱。止暑溼瀉。取甘平潤下之用耳。陽

氣下陷。腎氣虛脫。人勿服。○其葉搗汁溫服。療火盛泄精甚驗。若虛滑精氣不同者。禁用。

馬鞭草

一名龍牙草

苦微寒無毒

發明 馬鞭草色赤入肝經血分。故治婦人血氣腹脹。月經不勻。通經散瘀。治金瘡行血。活血生肌。汁飲。治喉痺癰腫。又搗敷治下部蠱瘡及蠅螻尿。男子陰腫。惟陰血虛而胃弱者勿服。

光明草

即狗尾草

發明 眼赤拳毛倒睫者。翻轉目臉。以一二莖蘸水。

戔去惡血甚良。

鱧腸草

一名金陵草
即旱蓮草

甘酸平無毒

發明 鱧腸草腎經血分藥。灸瘡發洪血不可止者。傳之立已。汁塗眉髮。生速而繁。皆益腎養血之驗。故烏鬚髮方用之。千金方有金陵煎。能益髭鬚。變白爲黑也。單用熬膏。治大便下血。腎主二便。但脾胃虛大。便易瀉者勿服。

連翹

苦平無毒。根名連軹。甘寒平小毒。

本經主寒熱鼠瘻。癰癰癰腫。惡瘡癰瘤。結熱蠱毒。

發明 連翹輕清而浮。本手少陰厥陰氣分藥。瀉心
經客熱。破血結。散氣聚。消腫毒。利小便。諸痛癢瘡。皆
屬心火。連翹瀉心爲瘡家聖藥。十二經瘡藥中不可
無此。乃結者散之之義。本經專主寒熱鼠瘻。瘰癧癰
瘤結熱等病。皆由足少陽膽經氣鬱而成。此藥正清
膽經鬱熱。癰疽惡瘡。無非營衛壅遏。得清涼以散之。
蠱毒所結。得辛香以解之。然苦寒之性。僅可以治熱
腫。故癰疽潰後。膿清色淡。及胃弱食少者。禁用。○根
寒降專下熱氣。治溼熱發黃。溼熱去而而悅好。眼目

明矣。仲景治痰熱在裡發黃麻黃連軹赤小豆湯主之。奈何世鮮知此如無根以實代之。

陸英

一名蒟蒻。又名接骨草。

苦寒無毒。

本經主骨間諸痺。四肢拘攣疼痛。膝寒痛。陰痿短氣。不足脚腫。

發明 陶蘇本草。甄權藥性。皆言陸英卽蒟蒻。田野村墟甚多人家所植。高大色赤者是陸英。田野所出不紅。葉上有粉者是蒟蒻。二味所主大率相類。外臺千金方多用之。世以其賤而棄置不講也。

藍實

大青

小青

苦寒無毒

有二種大者曰

大青苗高如蓼小者曰小青葉光如景天

向編在麻後今併此

本經解諸毒殺蠱蚊

同

疰鬼螫毒

發明

本經取用藍實乃大青之子是卽所謂蓼藍

也性稟至陰其味苦寒故能入肝本經取治蠱疰諸

毒專於清解溫熱諸邪也陽毒發斑咽痛必用之藥

而莖葉性味不異主治皆同日華子治天行熱狂疔

腫風疹朱肱治發斑咽痛有犀角大青湯大青四物

湯皆取其葉以治溫熱毒盛發斑之藥非正傷寒藥

也。蓋大青瀉肝膽之實火。正以祛心胃之邪熱。所以小兒疳熱丹毒爲要藥。○小青搗敷腫癰甚效。治血痢腹痛。殺百藥毒。解狼毒射罔斑蝥砒石等毒。千金以藍葉搗汁。治腹中鼈瘕。夏子山奇疾方。用板藍汁。治腹內應聲蟲。陳實功以藍同貝母搗敷人面瘡。皆取苦寒以散蘊結之熱毒也。○藍澱以藍浸地坑一宿。入石灰攪澄去水爲澱。其解諸毒。傳熱瘡之用。則一面殺蟲之功更効。蟲爲下膈。非此不除。今人以染缸水治噎膈。皆取其殺蟲也。

青黛

一名藍

鹹寒無毒

發明

青黛乃藍澱浮沫。攪澄掠出。收乾。瀉肝膽散。

鬱火治溫毒發斑。及產後熱痢下重。千金藍青丸用之。天行寒熱頭痛。水研服之。與藍同類。而止血拔毒殺蟲之功。似勝於藍。又治噎膈之疾。取其化蟲之力也。和溺白堊冰片吹口瘡最効。

蓼子

生木旁者曰水蓼。俗名葳草。

鹹微溫無毒。

本經明目溫中耐風寒。下水氣。療面浮腫癰瘍。

發明 蓼實治消渴去熱。及癰癰癰痞。腹脹皆取其

散熱消積之功。卽本經下水氣面浮腫癰瘍之用。其
葶草子專治病積。躰騫丸用之。蓼葉治大小腸邪氣。
黃帝云。蓼食過多。毒發心痛。婦人月事來不可食蓼。
及蒜。善爲血淋帶下。扁鵲云。蓼食之令人寒熱損骨
髓。殺丈夫陰氣。

菹菹 苦平無毒

本經主浸淫疥癬疽痔殺三蟲。

發明 菹菹利水散淫熱治黃痺霍亂療小兒魃病。
女子陰蝕。本經專主浸淫疥癬疽痔。所主皆淫熱之

病三蟲亦溼熱所化也。

白蒺藜

苦辛溫無毒酒浸焙焦去刺研用

本經主惡血破癥結積聚喉痺乳難久服長肌肉明目輕身。

發明 白蒺藜性升而散入肝腎經爲治風明目要藥風入少陰厥陰經者爲嚮導口病爲風木之邪風盛則目病風去則目明矣本經專破惡血積聚治喉痺乳難以苦能泄溫能宣辛能潤也此言刺蒺藜之功用耳久服長肌肉明目輕身以其入腎益精氣也。

此則專主沙苑蒺藜而言。其治痰消癰腫。搜腎藏風。氣又須刺者。爲破敵之先鋒。千金方治白癜風。以一味爲末。湯服二錢。日二服。服至半月。白處見紅點。至一月效。

沙苑蒺藜。甘溫無毒。產沙苑者。色微黑。而形似羊。腎若色微綠。雖產秦中。非沙苑也。酒蒸搗用。藥肆中以一種野田開紅花之土蒺藜。僞充。咬之亦生豆氣。但缺處有尖鉤。稍異耳。

發明 沙苑蒺藜。產於潼關。得漠北之氣。性降而補。

益腎治腰痛爲泄精虛勞要藥最能固精故聚精丸用此佐鱈膠大有殊功以之點湯代茶亦甚甘美益人但腎與膀胱偏熱者禁用以其性溫助火也

穀精草 辛溫無毒

發明 穀精草性體輕浮能入陽明分野治目中諸痛甚良而去星尤爲專藥明日退翳之功在菊花之上痘後生翳亦用之此草兔性喜食故目疾家專用與望月砂功用不殊

海金沙 甘寒無毒市舖每以沙上雜入須淘淨取

浮者曝乾燃之不沾指者真

發明 海金沙生於葉上。小腸膀胱血分藥也。熱伏二經血分者宜之。故小便熱淋莖痛爲要藥。腎藏真陽不足者忌用。

地椒

一名木楊梅。生水邊。條葉叢生。似菊莖端開黃花。實類椒而不赤。

辛溫無毒。

發明 地椒制丹砂粉霜。見庚辛玉冊。綱目名水楊梅。時珍主治疔瘡腫毒。

半邊蓮

辛平無毒。

發明 半邊蓮小草也。生陰溼膝輒邊。就地細梗引。

蔓節節生細葉。秋開小花。淡紅紫色。止有半邊如蓮花狀。故名。專治蛇傷。搗汁飲。以滓圖之。

地丁

苦辛寒無毒

發明 地丁有紫花白花二種。治疔腫惡瘡。兼療癰疽。發背。無名腫毒。其花紫者莖白。白者莖紫。故可通治疔腫。或云隨疔腫之色而用之。但漫腫無頭。不赤不腫者。禁用以其性寒。不利陰疽也。

見腫消

酸濇微毒

發明 見腫消。專消癰腫。及狗咬搗葉貼之。傷寒餘

毒發於耳前後用此一握同白及白斂大黃大蘗芋根共搗成餅入芒硝一錢白蜜少許和貼留頭乾卽易之

毒草部

大黃

本經名黃良一名將軍

苦寒無毒產川中者色如錦紋

而潤者良若峻用攻下生用邪氣在上必用酒浸上引而驅熱下行破瘀血非汁製虛勞吐血內有瘀積非汁拌炒黑用之大腸風秘燥結皂莢綠礬酒製又尿桶中浸過能散瘀血兼行滲道妊娠產後慎勿輕

用實熱內結。勢不可緩。酒蒸川之。凡服大黃下藥。須與穀氣相遠。得穀氣則不行矣。

本經下瘀血。血閉寒熱。破癥瘕積聚。留飲宿食。蕩滌腸胃。惟陳致新通利水穀。調中化食。安和五藏。

發明 大黃氣味俱厚。沉降純陰。乃脾胃大腸肝與三焦血分之藥。凡病在五經血分者。宜之。若在氣分者。用之。是誅伐無過矣。其功專於行瘀血。導血閉。通積滯。破癥瘕。消實熱。瀉痞滿。潤燥結。敷腫毒。總賴推陳致新之功。本經與元素皆謂去留飲宿食者。以宿

食留滯中宮久而發熱。故用苦寒化熱。宿食亦乘勢而下。後世不察。以爲大黃槩能消食。謬矣。蓋胃性喜溫惡溼。溫之則宿食融化。寒之則堅滯不消。以其能蕩滌腸胃。食積得以推蕩。然後穀氣通利。中氣調暢。飲食輸化。五藏安和矣。若食在上脘。雖經發熱。只須枳實黃連以消痞熱。宿食自通。若誤用大黃推蕩。不下反致結滯不消。爲害不淺。如瀉心湯治心氣不足。吐血衄血者。乃包絡肝脾之邪火有餘也。雖曰瀉心。實瀉四經血中伏火也。仲景治心下痞滿。按之濡者。

用大黃黃連瀉心湯此亦瀉脾胃之溼熱非瀉心也。若心下痞而復惡寒汗出者其人陽氣本虛加附子以溫散之病發於陰而反下之因作痞乃痰實與邪氣乘虛結於心下故曰瀉心實瀉脾也病發於陽而反下之則成結胸乃熱邪陷入陰分而結於膈上仲景大陷胃湯丸皆用大黃亦瀉脾胃血分之邪而降其濁氣也若結胸在氣分則用小陷胸湯痞滿在氣分則用半夏瀉心湯矣若病本陽邪或兼停食而攻發太過正氣消乏實結不解擬欲攻之而正氣不能

行其藥力。則加人參於桃核承氣中。以助硝黃之勢。如陶氏黃龍湯之製。乃先輩之成則也。蓋大黃芒硝瀉腸胃之燥熱。牽牛甘遂瀉腸胃之溼熱。巴豆硫黃瀉腸胃之寒結。各有定例。至於老人血枯便秘。氣虛使難。脾虛腹脹。少食。婦人血枯經閉。陰虛寒熱。脾氣痞積。腎虛動氣。及陰疽色白不起等證。不可妄用以取虛虛之禍。

商陸

一名當陸。赤者性劣。色白者良。

辛寒有毒。銅刀刮去皮。水浸

一宿。或醋炒。或黑豆拌蒸。用其赤者服之。傷人。令人

見鬼同生水服殺人

本經主水腫疝瘕痺蹇除癰腫殺鬼精物

發明 商陸苦寒傷脾其性下行利水本經專主水腫疝瘕等疾與大戟甘遂異性同功胃氣虛弱者不可用腫滿小便不利者以赤根搗爛入麝香三分貼於臍心以帛束之得小便利卽腫消或以大蒜同白商陸煮汁服亦治腫疾仲景治大病後腰以下腫牡蠣澤瀉散用之以其病後不堪受邪故用急迫以散之也然水腫因脾虛者若誤用之一時雖効未幾再

發決不可救

狼毒

苦辛寒大毒。陳者良。醋炒用。出東魯泰山。與

防葵相類。置水沉者爲狼毒。浮者卽防葵也。

本經主欬逆上氣。破積聚。飲食寒熱水氣。惡瘡鼠瘻。疽蝕鬼精蠱毒。殺飛鳥走獸。

發明

狼毒大毒。非恆用之品。本經治欬逆上氣。惟

質實氣壯。暴欬者宜之。又能破積聚。飲食寒熱水氣。以其迅利也。性能殺飛鳥走獸。其治惡瘡疽蝕蠱毒。所不待言。肘後方以狼毒二兩。附子半兩。治心腹連

痛脹急加旋復蜜丸。日服三丸治腹中冷痛及兩脇
氣結又爲散擦惡瘡疥癬。○愚按狼毒與防葵同根
但質有輕重之別雖本經主治不同一皆瞑眩之品
功用亦不甚相遠今狼毒內有輕浮者卽係防葵無
疑但本經條下有堅骨髓益氣輕身之說其性善走
散力能攻逐三蟲故有益氣輕身之功本經不言攻
蟲而攻蟲之用與狼牙無異。

狼牙

本經名牙下

苦辛寒有毒以其形似獸牙故名白者

良。○中溼糜爛生衣者殺人。

本經主邪氣熱氣疥癩惡瘍瘡痔去白蟲

發明

狼牙較狼毒之性稍緩而所治亦相類金匱

九痛丸用狼牙局方用狼毒方用附子三兩狼牙人

參吳茱萸乾薑各一兩巴霜一錢蜜丸梧子大日服

二三丸治九種心痛并卒中惡腹脹滿又連年積冷

流注心胸痛及冷衝上氣落馬墜車血疾皆主之本

經治邪氣熱氣去白蟲蓋心痛多有屬蟲積者故前

方用之亦治惡瘍瘡痔金匱外臺千金並以煎洗陰

瘡蝕癢搗汁治射工溪毒肘後以之搗貼金瘡外臺

以之蜜丸。漿水服一九。治寸白蟲。皆取殺蟲解毒之功也。

防葵 辛寒有毒。

本經主疝瘕腸泄。膀胱熱結溺不下。欬逆溼痞。癰癩驚邪狂走。久服堅骨髓益氣輕身。

發明 防葵辛寒。性善走散。能治疝瘕腸泄。膀胱熱結等證。而別錄又言療五藏虛氣。小腹支滿。臚脹口乾。除腎邪強志。中有火者。不可久服。令人恍惚見鬼。二說各有主見。一以治濁邪支塞。驚邪狂走。故須久

服。開除積垢。自然髓充骨堅。正氣自復。一以療五藏
虛氣。腎邪逆滿。故不可久服。久服恐正氣愈虛。不能
制五志之火。引領痰溼。上侮君主。令人恍惚見鬼。同
一防葵。而有治驚邪狂走。與久服見鬼之不同也。嘗
攷千金方。防葵爲治風虛通血脈之上藥。每與參朮
鍾乳石英並用。取其祛逐風虛通利血脈。而正氣得
復。腎志自強。當無助火爲虐之慮矣。

藟茹 辛寒有小毒。折之汁出。凝黑如漆。故名漆頭
藟。如色白者名草藟茹。

本經主疽蝕惡肉。敗瘡死肌。殺疥蟲。排膿惡血。除大風熱氣。善忘不寐。

發明 蘭茹本經治惡肉敗瘡等病。而素問四烏鯁一蘘茹丸。當非此蘭茹可治也。聖惠治頭風旋眩。千金治小兒癰疽。並用漆頭蘭茹。姚僧坦治癰疽去惡血。有白蘭茹丸。二者皆能散血。其治善忘不寐。亦是因風熱侵犯心包。膽府所致。散其風熱。則無不寐善忘之患矣。

大戟 苦辛大寒。有毒。反甘草。入藥惟用正根。誤服

傍株令人冷瀉。裏煮則不損脾。乘軟去骨用。

本經主蠱毒十二水。腹滿急痛積聚。中風皮膚疼痛。吐逆。

發明 大戟性稟陰毒峻利。首推苦寒下走腎陰。辛散上瀉肺氣。兼橫行經脈。故本經專治蠱毒十二水。腹滿急痛等證。皆濁陰填塞所致。然惟暴脹爲宜。云中風者。是指風水膚脹而言。否則傳寫之誤耳。夫大戟甘遂之苦。以泄水者。腎所主也。痰涎之爲物。隨氣升降。無處不到。入於心則迷竅而成癰癩。妄言妄見。

入於肺。則寒竅而成欬唾。稠黏喘急。背冷入於肝。則留伏蓄聚而成脇痛。乾嘔寒熱往來。入於經絡。則麻痺疼痛。入於筋骨。則頸項胸背腰脇手足牽引隱痛。三因方並以控涎丹主之。大戟能泄藏府之水。溼甘遂能行經隧之水。溼白芥子能散皮裏膜外之痰氣。惟善用者能收奇功也。痘瘡變黑歸腎。棗變百祥丸。用大戟製棗。去戟用棗。以瀉肝邪。非瀉腎也。實則瀉其子。因腎邪實而瀉其肝也。仲景云。心下痞滿引脇下痛。乾嘔短氣者。十棗湯主之。其中亦有大戟。夫乾

嘔脇痛豈非肝膽之病乎。百祥丸之瀉肝明矣。至玉
輻丹同續隨子山茨菇等解蠱毒藥則又不獨肝膽
矣。其脾胃肝腎虛寒陰水泛濫犯之立斃不可不審。
澤漆本經名漆莖苦寒小毒別錄日華陶氏皆言是大
戟苗。綱目名猫兒眼睛草。時珍云。江湖源澤多有之。
搗葉有白汁粘人故名。

本經主皮膚大熱大腹水氣四肢面目浮腫丈夫陰
氣不足

發明 澤漆利水功類大戟遂誤以爲大戟苗本經

言利丈夫陰氣則與大戰不相侔也。其治皮膚大熱。面浮腹大等證。兼挾表熱而言。其性與大戰亦相類也。金匱澤漆湯方用澤漆半夏紫參白前甘草人參。桂心生薑以治肺欬。上氣脈沉。大明言止瘧疾。消痰退熱。肘後聖惠易簡伏瘕水腫脚氣皆用之。

甘遂 苦甘大寒有毒。麪裹煨熟用。反甘草。其根皮赤肉色白。作連珠。大如指頭。質重不蛀者良。赤皮者其性尤烈。

本經主大腹疝瘕腹滿。面目浮腫。留飲宿食。破癥堅。

積聚。利水穀道。

發明 甘遂色白味苦。先升後降。乃瀉水之峻藥。本經治大腹疝瘕。面目浮腫。留飲宿食等病。取其苦寒。迅利疏通。十二經攻堅破結。直達水氣所結之處。仲景大陷胸湯。金匱甘草半夏湯用之。但大瀉元氣。且有毒。不可輕用。腎主水。凝則爲痰。飲溢則爲腫脹。甘遂能泄腎經溼氣。治痰之本也。不可過服。中病則止。仲景治心下留飲。與甘草同用。取其相反而立功也。肘後方治身面浮腫。甘遂末二錢。以雄豬腎一枚。分

七片入末拌勻。溼紙裹煨令熟。每日服一片。至四五服。當腹鳴。小便利。是其効也。然水腫鼓脹。類多脾陰不足。土虛不能制水。法當辛溫補脾實水。兼利小便。若誤用甘遂大戟。商陸牽牛等味。禍不旋踵。而癰瘤心風血邪。甘遂二錢爲末。以猪心管血和藥入心內。縛定。溼紙裹煨熟。取藥入辰砂末一錢。分四圓。每服一圓。以猪心煎湯下。大便利下惡物爲効。未下更服一回。凡水腫未全消者。以甘遂末塗腹。遶臍令滿。內服甘草湯。其腫便去。二物相反。而感應如此。塗腫毒。

如上法亦得散。又治肥人卒然耳聾。甘遂一枚。綿裹塞耳中。口嚼甘草。耳卒然自通也。

續隨子

即千金子

辛溫有毒。去殼取色白者。以紙包壓

去油取霜用。

發明 續隨子下氣最速。然有毒損人。與大戟澤漆甘遂莖葉相似。主療亦相似。其功長於利水解毒。故玉樞丹用之。服後瀉多。以醋同粥食。即止。若脾虛便滑之人。誤服必死。黑子疣贅。續隨子搗爛。時塗之。自落。或以煮線繫痛根。時時繫之。漸脫。

葇若

一名天仙子

子苦寒根苦辛有毒

本經主齒痛出蟲肉痺拘急多食令人狂走。

發明 葇若入癲狂方用然皆用其子耳故言勿令

子破破則令人發狂。本經治肉痺蟲豰用其毒以攻

治也。千金治石癰堅硬不作膿者葇若子爲末醋和

傅瘡頭根卽拔出打撲折傷羊脂調葇若子末傅之

○葇若根主治與子不殊瘡疾不止葇若根燒灰水

服一錢七卽止惡癰有蟲葇若根搗爛和蜜傅之惡

刺傷人葇若根水煮汁浸冷卽易之箭頭不出此亦

主之皆千金神方也。狂犬咬人，葇荂根和鹽，日三傳之。此外臺秘要方也。今人用根治噎膈反胃，取其性走以祛胃中留滯之邪。噎膈得以暫開，虛者誤服爲害不測。時珍云：葇荂之功未見如所說，而其毒有甚焉。煮一二日，尚能生芽，其爲物可知矣。服葇荂雲實，防葵、赤商陸皆令人狂惑見鬼者，蓋此類皆稟陰毒，能使痰迷心竅，閉其神明以亂視聽故耳。

蓖麻子 甘辛溫有毒。去殼取仁，白者良。禁食炒豆犯之必脹。

發明 蓖麻屬陰其性善收能追膿取毒拔邪外出
爲外科要藥能出有形之滯物故取胎產胞衣剩骨
膠血者用之時珍云蓖麻甘辛有熱毒氣味頗近巴
豆亦能利人故下水氣其性善走能開通諸竅經絡
治偏風失音口噤口目喎斜頭風七竅諸病不止於
出有形之物也蓋鵜鴒油能引藥氣入內蓖麻油能
拔病氣出外故諸膏多用之偏風手足不舉同羊脂
穿山甲麝香煎膏日摩漸正研塗療癰疽毒癰腫卽
消蓋能引毒外出耳一人病手臂結塊腫痛用蓖麻

仁搗膏貼之卽愈。一入病氣鬱而偏頭痛。用此同乳香食鹽搗煖太陽其痛立止。一婦產後子腸不收搗貼丹田卽上。此藥外用屢奏奇勩。但不宜內服耳。

常山

一名
博山

苦辛溫有毒。川產淡黃細實如雞骨者

良。醋炒則不吐人。

本經主傷寒寒熱發溫瘧鬼毒。胸中痰結吐逆。發明夫瘡有六經五藏痰溼食積風邪瘴疫須分陰陽虛實不可一槩論也。常山治瘡有剗痰截病之功。須在發散表邪及提出陽分之後服之得宜生用。

多用則上行必吐。若酒浸炒透則氣少緩。稍用錢許亦不致吐也。得甘草則吐得大黃則利。蓋無痰不作。瘧常山專在驅逐痰水。楊士羸云常山治瘧人皆薄之。瘧家多畜痰涎黃水。或停滯心下。或結滯脇間。乃生寒熱。法當吐涎逐水。常山豈容不用。所以本經專主寒熱溫瘧。痰結吐逆。以瘧病多由傷寒寒熱。或時氣溫疫而致痰水蓄聚心下也。夫水在上焦則常山能吐之。水在脇下則常山能破其滯而下其水。但須行血藥佐之。如桃仁、蓬朮、穿山甲之類。其有純熱發

瘡或蘊熱內實之證。投以常山。大便點滴而下。似泄非泄。須用大黃爲佐。瀉利數行。然後獲愈。常山陰毒之草。其性暴悍。雖有破瘡。逐飲之能然。善損真氣。所以仲景治瘡方中。從無及此。而夏傷於暑。秋必痃瘕。及瘡在三陰。元氣虛寒。人則常山穿山甲輩。皆爲戕戕。

蜀榛

苦辛溫有毒

本經主瘡及欬逆寒熱腹中癥堅。積聚邪氣。蠱毒鬼疰。

發明 蜀榛卽常山之苗。故本經治瘡及欬逆寒熱。積聚蠱毒。功效與之相類。金匱治牝癰獨寒不熱者。有蜀榛散。用蜀榛雲母龍骨酢漿水服之。溫瘡加蜀榛一錢。用酸漿者。取酸收以飲蜀榛之辛散也。

藜蘆 辛苦寒有毒。反五參。服之吐不止者。飲葱湯卽止。

本經主蠱毒欬逆。泄痢腸澼。頭瘍疥癰惡瘡。殺諸蟲。去死肌。

發明 藜蘆服錢匙則吐。卽本經治蠱毒欬逆。泄。

利腸瀉。是指積氣內盛者而言。積去則欬與利止矣。
又通頂。令人嚏。按常山吐瘧痰。瓜蒂吐熱痰。烏附尖
吐溼痰。萊菔子吐氣痰。藜蘆則吐風痰者也。凡胸中
有老痰。或中蠱毒。止可借其宣吐。切勿沾口。大損胃
中津液也。若欬逆泄利。腸瀉等證。苟非實邪壅滯。慎
勿輕試。不可因本經之言而致惑也。別錄治喉痺不
通鼻中。瘰肉竝爲散。吹鼻孔效。

附子 辛熱大毒。反半夏。瓜萆貝母。白藪。古方以一
兩一枚者爲力全。近時專取大者爲勝。用鹽過多。雖

一兩五六錢製熟不及七八錢且容易腐爛若欲久藏須同礬灰入礮中置近火處庶可經久其性熱有毒必正節角少頂細臍正者爲上頂粗有節多鼠乳者次之傷缺偏縐者爲下有兩岐者名烏喙此稟氣不正耑主大風頑痺附子生用則散陰寒熟用則助真元生用去皮臍熟用甘草童便制若欲久藏一味甘草濃煎汁煮汁盡爲度入陽虛補劑用黃連甘草制凡中其毒生萊菔汁及黃連解之近時烏附多產陝西其質粗其皮厚其色白其肉鬆其味易行易過

非若川附之色黑皮薄肉理緊細性味之辛而不烈久而愈辣峻補命門真火也

本經主風寒欬逆邪氣寒溼痿痺拘攣膝痛不能行步破癥堅積聚血瘕金瘡

發明 附子氣味俱厚而辛烈能通行十二經無所不至。煖脾胃而通膈噎。補命門而救陽虛。除心腹腰膝冷痛。開肢體痺溼痿弱。療傷寒呃逆不止。主督脈脊強而厥。救寒疝引痛欲死。欬癰疽久潰不收。及小兒脾弱慢驚。竝須製熟用之。附子爲陰證要藥。凡傷

寒陰證厥逆直中三陰及中寒夾陰雖身熱而脈沉細或浮虛無力者非此不治或厥冷腹痛脈沉細甚則腎青囊縮者急須生附以峻溫散之本經治風寒欬逆當是陰寒呃逆亥豕之謬詳本經所主諸證皆陰寒之邪乘虛客犯所致其主金瘡者是傷久氣血虛寒不能收斂非血出不止之金瘡也別錄又主腰脊風寒脚氣痿弱心腹冷痛等病總取溫經散寒之力耳附子稟雄壯之質有斬關奪將之能能引補氣藥行十二經以追復散失之元陽引補血藥入血分

以培養不足之真陰。引發散藥開腠理。以驅逐在表之風寒。引溫暖藥達下焦。以祛除在裡之冷溼。附子以白朮爲佐。乃除寒溼之聖藥。然須並用生者。方得開通經絡。若氣虛熱甚。宜少用熟附。以行參耆之力。肥人多溼。亦宜少加烏附。行經附子得乾薑炙甘草。名四逆湯。主少陰經寒證。得桂枝甘草薑棗。名桂枝附子湯。治風溼相搏。身體疼煩。不能轉側。得白朮甘草薑棗。名朮附湯。治風虛頭重眩極。得麻黃細辛。名麻黃附子細辛湯。治少陰病發熱脈沉。得大黃芩連。

名附子瀉心湯。治心下痞而惡寒。汗出得大黃細辛。
名大黃附子湯。治脇下偏痛。發熱脈弦緊。得參朮苓。
芍名附子湯。治少陰病。始得之。背惡寒。得茯苓白朮。
芍藥生薑名真武湯。治少陰病。腹痛小便不利。四肢
疼痛。自利。得乾薑葱白名白通湯。治少陰病。利下脈
微。若厥逆無脈。乾嘔而煩。面色赤。加葱白以通陽氣。
此皆得配合之神妙。能起死回生。於反掌間。生熟各
隨本方。趙嗣真云。生附配乾薑。補中有發。熟附配麻
黃。發中有補。宜生宜熟。不出此中妙用也。至於崔氏

八味丸用爲少陰嚮導。後世認爲補藥誤矣。東垣治陰盛格陽而赤目赤煩渴引飲。脈來七八至。但按之卽散者。用乾薑附子湯。加人參半觔。服之得汗而愈。時珍云。陰寒在下。虛陽在上。治之以寒。則陰氣愈盛。治之以熱。則拒而不納。熱藥冷服。下咽之後。冷性旣消。熱性便發。病氣隨愈。此熱因寒用之法也。附子性沉著。溫脾逐寒。烏頭性升發。溫脾去風。若寒疾卽用附子。風疾卽用烏頭。二藥俱走而不守。故墮胎爲百藥長。然妊娠脈弦發熱。胎脹惡寒。小腹如扇。金匱用

附子湯以安其胎。此神聖之妙用也。若傷寒發熱頭痛皆除。熱傳三陰而見厥逆。脈沉。此厥深熱深之候。證必先發熱。頭痛七八日或十餘日後而見厥冷。脈沉。此爲陽厥。大便必不瀉而閉。及溫疫熱伏厥逆。與陰虛內熱。火鬱於內而惡寒者。誤用不旋踵告變矣。附子乃退陰回陽必用之藥。近世疑而不用。直待陰極陽竭而用。已遲矣。且夾陰頭痛足冷上熱下寒。陰邪內盛。陽氣外衰。急需人參健脈以益其原。佐以附子溫經散寒。捨此不用。將何救之。

川烏頭

辛熱有毒入祛風藥同細辛黑豆煮入活

絡藥同甘草炮製按烏頭乃附子之母春生新附卽

採其母諸家本草未常表明但云春採者爲烏頭故

舉世誤認烏頭爲春時取附子之小者往往以側子

代用誤人多矣反半夏

發明 烏頭得春升之氣故治風爲嚮導主中風惡

風半身不遂風寒溼痺心腹冷痛肩髀痛不可俛仰

及陰疽久不潰者潰久瘡寒反肉不斂者並宜少加

以通血脈惟在用之得宜小兒慢驚搐搦涎壅厥逆

生川烏全蠍加生薑煎服効其烏附之尖爲末茶清服半錢吐癰癩風痰取其銳氣從下焦直達病所借茶清涌之而出也夫藥之相反者以烏頭半夏爲最而金匱赤丸及普濟方俱二味同用非妙達聖義者難以語此。

天雄 辛溫大毒卽附子之獨顆無附大倍附子者制法與附子同。

本經主大風寒溼痺歷節痛拘攣緩急破積聚邪氣金瘡強骨髓輕身健行。

發明 天雄稟純陽之性。補命門三焦壯陽精強腎氣。過於附子。故本經用以治大風寒。開溼痺。歷節拘攣。諸病。陽氣衰痿者。佐人參用之。天雄附子性皆下行。若上焦陽虛者。當用參耆。不當用此也。且烏附之尖。皆是向下生者。其臍乃向上生苗處。宗奭元素皆誤認尖爲上。惟震亨以爲下部之佐者。得之。肘後三建湯。治元陽素虛。寒邪外入。厥冷脈沉。及傷寒陰毒。川烏附子天雄炮制等分。每服四錢。加生薑十五片。溫服。金匱治男子失精。用天雄龍骨桂枝白朮爲散。

酒服半錢。淮南用天雄一枚，納雄雞腹中煮爛，搗食之，令人勇敢壯肝腎之氣也。

側子

卽剪子

辛熱大毒。

發明 側子乃散生烏附之旁，側體無定，在其氣輕揚，宜其發散。四肢充達，皮毛爲治風之藥。唐元希聲治癰瘰有側子湯，見外臺秘要。○又附子之初生，瑣細未成者，曰漏籃，言其小而籃不能盛，漏出籃下也。專治冷漏惡瘡。

草烏頭

一名毒公

辛熱大毒。卽烏頭之野生者，或生用。

或炮用各隨本方有兩岐相合如鳥之喙者名鳥喙。本經主中風惡風洗洗出汗除寒溼痺欬逆上氣破積聚寒熱其汁煎之名射罔殺禽獸。

發明 草烏頭射罔乃至毒之物非若川烏頭附子之比。自非風頑急疾不可輕投此藥。此能搜風勝溼。開頑痰治頑瘡以毒攻毒而已。本經治惡風洗洗汗出但能去惡風而不能回陽散寒可知。昔人病風癰服草烏頭木鼈子藥過多甫入腹遂麻痺不救。烏附五種主治攸分。附子大壯元陽雖偏下焦而周身內

外無所不至。天雄峻濕不減於附。而無頃刻回陽之功。川烏耑搜風溼痛痺。却少溫經之力。則子善行四末。不入藏府。草烏悍烈。僅堪外治。此烏附之同類異性者。至於烏喙。稟氣不純。服食遠之可也。

射罔 苦溫大毒。人中射罔毒。以甘草藍汁小豆葉浮萍冷水薺苳皆可一味禦之。

發癰 烏喙射罔至毒之藥。雖有治尸疰癰堅癭瘡毒腫及蛇咬。先取塗肉四畔。漸漸近瘡。習習逐病至骨。瘡有熱膿及黃水者。方可塗之。若無膿水有生血。

及新傷破卽不可塗立能殺人

白附子

辛甘溫小毒

發明 白附子純陽引藥勢上行乃陽明經藥治肝腎風癰陰癢洗肝黑入面脂用其性燥血耗氣是以類中風證雖有痰壅禁用小兒慢驚勿服

天南星

本經名虎掌

苦辛溫有毒治風痰生用須以礬

湯浸若熟用以溼紙包於塘火中炮製用造膽星法以南星磨末篩去皮臘月入黃牛膽中懸當風處乾之年久多拌者良或兼蜂蜜以潤其燥但色易黑不

能久藏。

本經主心痛寒熱結氣。積聚伏梁。筋痿拘緩。利水道。發明。天南星之名。始自開寶。卽本經之虎掌也。以葉取象。則名虎掌。根類取名。故曰南星。雖具二名。實係一物。爲開滌風痰之耑藥。本經治心痛寒熱結氣。卽開寶之下氣利胸膈也。本經之治積聚伏梁。卽開寶之破堅積也。本經之治筋痿拘緩。卽開寶之治中風除痲痺也。本經之利水道。卽開寶之散血墮胎也。夫水由血不歸經所化。蘊積於經而爲溼熱。則風從

內發津液凝聚爲腫脹。爲麻痺。爲眩暈。爲顛仆。爲口
噤。身強爲筋脈拘緩。爲口眼喎斜。各隨身之所偏而
留著不散。內爲積聚。外爲癰腫。上爲心痛。下爲墮胎。
種種變端。總由溼熱所致。蓋緣一物二名。後世各執
一例。是不能無兩岐之說。卽仲淳之明。尚以開寶之
文衍之爲疏。而本經主治。置之罔聞。何怪諸家採集
藥性。一皆舍本逐末乎。按天南星。味辛而麻。故能治
風散血。氣溫而燥。故能勝溼除痰。性緊而毒。故能攻
積拔腫。而治口喎舌糜。諸風口禁。更以石菖蒲。人參。

佐之。南星半夏皆治痰藥也。然南星專走經絡。故中風麻痺以之爲嚮導。半夏專走腸胃。故嘔逆泄瀉以之爲嚮導。千金治婦人頭風攻目作痛。掘地作坑。燒赤入南星於中。以醋沃之。葢定候冷。爲末酒服半錢。易簡治而生疣子。醋調南星末塗之。其新生之芽曰由跋。本經治毒腫結氣。千金方用之。取其開結熱之用耳。

半夏 辛溫有毒。湯浸同皂莢白礬煮熟。薑汁拌焙乾用。或皂莢白礬薑汁竹瀝四製尤妙。附痛醋炒用。

小兒驚痰發搐及膽虛不得眠。猪膽汁炒。入脾胃丸劑爲細末。薑汁拌。盒作麴。候陳炒用。反烏附者以辛燥鼓激悍烈之性也。忌羊血海藻飴糖者以甘膩凝滯開發之力也。

本經主傷寒寒熱。心下堅。胸脹。欬逆。頭眩。咽喉腫痛。腸鳴。下氣止汗。

發明。半夏爲足少陽本藥。兼入足陽明太陰。虛而有痰氣。宜加用之。胃冷嘔噦。方藥之最要。止嘔爲足陽明除痰爲足太陰。柴胡爲之使。故小柴胡湯用之。

雖爲止嘔亦助柴胡黃芩主往來寒熱也。本經治傷寒寒熱非取其辛溫散結之力歟。治心下堅胸脹非取其攻堅消痞之力歟。治欬逆頭眩非取其滌痰散邪之力歟。治咽喉腫痛非取其分解陰火之力歟。治腸鳴下氣止汗非取其利水開痰之力歟。同蒼朮茯苓治溼痰。同括蕒黃芩治熱痰。同南星前胡治風痰。同芥子薑汁治寒痰。惟燥痰宜枯蕒貝母非半夏所能治也。半夏性燥能去溼豁痰健脾。今人惟知半夏去痰不言益脾利水。脾無留溼則不生痰。故脾爲生

痰之源。肺爲貯痰之器。半夏能主痰。飲及腹脹者爲其體滑而味辛性溫也。二陳湯能使大便秘潤而小便長。世俗皆以半夏南星爲性燥誤矣。溼去則土燥。痰涎不生。非二物之性燥也。古方治咽痛喉痺吐血下血。多用二物。非禁劑也。按靈樞云。陽氣滿則陽蹻盛。不得入於陰。陰虛則目不瞑。飲以半夏湯一劑。通其陰陽。其卧立至。半夏得栝蒌實黃連。名小陷胸湯。治傷寒小結胸。得雞子清苦酒。名苦酒湯。治少陰咽痛。生瘡。語聲不出。得生薑。名小半夏湯。治支飲作嘔。得

人參白蜜名太半夏湯治嘔吐反胃得麻黃蜜丸名
半夏麻黃丸治心下悸忪得茯苓甘草以醋煮半夏
共爲末薑汁麴糊丸名消暑丸治伏暑引飲脾胃不
和此皆得半夏之妙用惟陰虛羸瘦骨蒸汗泄火鬱
頭痛熱傷欬嗽及消渴肺痿欬逆失血肢體羸瘦禁
用以非溼熱之邪而用利竅行溼之藥重竭其津
之罪也豈藥之咎哉

蚤休

卽草紫河車金線重樓俗名七葉一枝花

苦微寒有毒

本經主驚癇搖頭弄舌熱氣在腹中

發明 蚤休足厥陰經藥能治驚癇瘡疾癰瘰癧腫
詳本經主治總取開結導熱而驚癇搖頭弄舌之熱
邪自除元氣虛者禁用醋磨敷癰腫蛇毒有效

鬼臼

本經名九曰一名天曰一名馬目毒公又有木
律草害母草獨脚蓮蓋天花瑤田草山荷葉入

角盤唐婆鏡鬼藥
爵片解毒等名

辛溫有毒

本經殺蟲毒鬼疰精物辟惡氣不祥逐邪解百毒
發明 鬼臼辛溫以毒攻毒之猛藥本經殺鬼疰蟲
毒辟惡逐邪寧無顧名思實之意其治邪瘡陰疽蛇
毒用之良方一字神散治子死腹中無灰酒下一錢

立効。射工中人寒熱發瘡。鬼臼葉一握。苦酒搗汁服一升。日二次効。

射干

本經名烏扇。其葉叢生。橫鋪一面。如烏翅及扇之狀。故有烏扇烏吹。烏蒲。鳳翼。鬼扇。扇竹。仙人

掌等名。

苦辛微溫。有毒。米泔浸煮熟炒用。

本經主欬逆上氣。喉痺咽痛。不得消息。散結氣。腹中邪逆。食飲大熱。

發明 苦能下泄。辛能上散。本經治欬逆上氣。喉痺咽痛。不得消息。專取散結氣之功。為喉痛咽痛要藥。痘中咽痛。隨手取効。以其力能解散毒鬱也。治腹中

邪逆、食飲太熱。是指宿血在內發熱而言。卽別錄療老血在心脾間之謂。金匱治欬而上氣。喉中水鷄聲。有射干麻黃湯。又治瘡母。鱉甲煎丸。用烏扇燒過。取其降厥陰之相火也。火降則血散腫消而痰結自解。千金治喉痺。有烏扇膏。中射干。毒生瘡。烏扇升麻煎。服以滓敷瘡上。効。治便毒。射干。同生薑煎服。利兩三行。卽効。以其性善降。服之必瀉。虛人禁用。苗名鳶尾。根名鳶頭。又名東海鳶頭。千金治蠱毒方用之。

玉簪根

卽白鶴花

苦辛溫有毒

發明 玉簪入骨。與堅故能下骨。鯁以根搗自然汁。於竹筒灌入喉。不可著牙齒。刮骨取牙。玉簪根乾者。一錢。白砒三分。白礪七分。蓬砂三分。威靈仙三分。草烏頭一分半。爲末。點少許。疼處自落。

鳳仙子

又名急
性子

苦溫小毒

發明 鳳仙子性最急速。故能透骨軟堅。通竅搜頑。痰下死胎積塊。噎膈骨鯁。治狂癡勝金丹。用之取其性急。領砒藥吐泄也。庖人煮肉硬者。投子數粒。卽易爛。是其驗也。性與玉簪根同。不可著齒。多食戟人咽。

入砒點疼牙郎落同獨辦蒜搗塗痞塊卽消加麝香
阿魏尤捷花治蛇傷插酒服之卽解

曼陀羅花

實名風茄

辛溫有毒

發明 此花浸酒治風少頃昏昏如醉動火之患也
故麻藥爲之首推八月採此花七月採麻子花陰乾
等分爲末熱酒調服三錢少頃昏昏如醉剉瘡灸火
宜先敷此則不覺苦也寒溼脚氣煎湯洗之

羊躑躅

卽鬧羊花

辛溫大毒惡諸石及麪不入湯劑

本經主賊風在皮膚中淫淫痛溫瘧惡毒諸痺

發明 羊躑躅治中風癱瘓性祛風寒溼邪故可以
治諸痺惡毒正與本經之治相符用其毒以攻毒也
然須諒病人虛實而用和劑局方伏虎丹中用之南
方治蠱毒有躑躅花散其性之猛烈可知此物有大
毒曾有人以根入酒飲遂致於斃不可近眼令人昏
翳同天南星川烏草烏助虐尤甚其中其毒者以藜豆
解之

芫花 苦辛溫有毒陳者良水浸一宿曬乾醋炒以
去其毒弘景曰用者微熬不可近眼反甘草

本經主欬逆上氣喉鳴咽腫短氣蠱毒鬼瘡疔瘕癰腫殺蟲魚。

發明 芫花消痰飲水腫故本經治欬逆咽腫疔瘕癰毒皆是痰溼內壅之象仲景治傷寒表不解心下有水氣乾嘔發熱而欬或喘或利者小青龍湯主之若表已解有時頭痛汗出惡寒心下有水氣乾嘔痛引兩脇或喘或欬者十棗湯主之蓋小青龍湯驅逐表邪使水氣從毛竅而出內經開鬼門法也十棗湯驅逐裏邪使水氣從大小便而泄內經潔淨府去菟

陳莖法也。芫花大戟甘遂之性逐水瀉溼能直達水飲窠囊隱僻處取効甚捷不可過劑泄人真元。

莧花

苦寒有毒。熬黃用。芫花葉尖如柳花紫似荊。

莧花苗莖無刺。花細色黃。與芫花絕不相似。或言無莧花以芫花代之。性相近耳。

本經主傷寒溫瘧。下十二經水。破積聚。大堅癥瘕。蕩滌腸中。留癖飲食。寒熱邪氣。利水道。

發明 莧花苦辛能破積聚癥瘕。治痰飲欬逆去咽喉腫閉。本經治傷寒溫瘧者。取苦寒以攻蘊積伏匿。

之邪也。言下十二經水。又治飲食寒熱邪氣者。以其苦寒峻利飲食之邪。亦得蕩滌而寒熱自除也。仲景用此止利以行水。水去則利止矣。又小青龍湯云。若微利者。去麻黃。加薤花。蓋亦取其利水也。愚按薤花。薤花雖有辛溫開表苦寒走滲之不同。而破結逐水之功。用彷彿本經。雖無芫花利水之說。而仲景十棗湯。前行利水。是以藥肆皆不辨混。收醫家亦不辨混。用猶夫食穀得以療饑。食黍亦可療饑。混用可無妨礙。若礬石礬石字形相類。藥狀亦相類。可不辨而混。

用耶

莽草

一名莽卽鼠莽本作蒺字此物有毒食之令人迷惘故名山人以之毒鼠漁人以之毒魚與醉

魚草總

一類

辛溫有毒

本經主頭風癰腫疔瘕除結氣疥癢殺蟲魚。

發明

莽草大毒善殺魚鼠其性可知本經治疔瘕

結氣蕩滌在內之宿積也療癰腫頭風搜逐在外之

邪毒也。但性最猛烈服之令人瞑眩千金方每與茵

芋同爲搜風滌惡之峻劑近世罕能用之惟毒魚之

外僅以浴頑痺溼風及煎漱蟲牙然沐時勿令人眼

中其毒者。惟草紫河車磨水服之可解。黑豆煮汁服之亦解。以豆汁澆齊根則爛。物類之相制如此。至於茵芋。人所未識。毋怪近世醫術之卑也。

茵芋 苦辛溫有毒。生泰山川谷。春生苗高三四尺。莖赤葉似石榴而短厚。又似石南。四月開細白花。五月結實。今彭城海鹽杭州雍州絳州華州皆有。四月採葉。七月採莖。陰乾用之。

本經主五藏邪氣。心腹寒熱。羸瘦如瘡。狀發作有時。諸關節風溼痺痛。

發明茵芋大毒。世亦罕用。本經雖有治羸瘦如瘡
狀一語。皆是五藏有邪氣。心腹寒熱所致。非能療虛
羸寒熱也。其治關節風溼痺痛。是其正治。時珍曰。干
金外臺諸方治風癰。有茵芋丸。治風痺。有茵芋酒。治
婦人產後中風。有茵芋膏。風溼諸方多用之。茵芋石
南莽草。皆古人治風妙品。近世罕知。

鈎吻

本經名野葛。紅花者名火把草。黃花者名黃藤。千金名黃野葛。

辛溫大毒

本經主金瘡乳癰。中惡風。欬逆。上氣。水腫。殺鬼。疰蠱

毒。

發明 野葛之毒甚於戈戟。故有鈎吻之名。而風毒
蠱疰用之。以毒攻毒。苟非大劑。亦難輕用。紫者破血
結。青者破痰積。其葉與黃精葉相似。但鈎吻葉有毛
鈎。二箇黃精葉似竹葉而無毛鈎。可以明辨。誤食鈎
吻葉。飲冷水卽死。以死尸懸樹上。汁滴在地。卽生蔞
子。收之。名茵藥。毒於野葛。薤菜搗汁解之。取薤菜汁
滴野葛苗。卽萎死。中野葛毒。急不可得薤菜。多飲甘
草汁。人尿汁。或白鴨血。白鷺血。羊血灌之。亦解。

蔓草部

菟絲子

本經名菟蘿

辛甘平無毒。酒煮搗爛作餅焙乾。

用雷公曰。凡使勿用天碧草子。真相似。只是味酸。瀉并粘也。菟絲最難得真。有人以子種出。皆木犀草。今藥肆所賣。俱係此類。然服亦有微功。不似假石蓮子之大苦大寒。大傷胃氣。伐人天元也。至賤之物。尚爾若此。况珍貴之品。能無偽乎。

本經續絕傷。補不足。益氣力。肥健人。

發明 菟絲子去風明目。肝腎氣分藥也。其性味辛溫。質粘。與杜仲之壯筋暖腰膝無異。五味之中惟辛。

通四氣復兼四味。經曰腎苦燥。急食辛以潤之。菟絲子五味子之屬是也。與辛香燥熱之辛迥乎不同。此補脾腎肝三經要藥。本經言續絕傷補不足。益氣力。肥健人者。三經俱實。而絕傷續不足。補氣力長。令人肥健矣。其功專於益精髓。堅筋骨。止遺泄。主莖寒。精出溺有餘。瀝去膝脛痠軟。老人肝腎氣虛。腰痛膝冷。合補骨脂杜仲用之。諸經膜皆屬於肝也。氣虛腫子無神者。以麥門冬佐之。蜜丸服。効。凡陽強不痿。大便燥結。小水赤澇者。勿用。以其性偏助陽也。

五味子

酸溫無毒。產遼東者佳。微焙搗碎用。

本經主益氣欬逆上氣。勞傷羸瘦。補不足。強陰。益男子精。

發明 五味子右腎命門本藥。本經主欬逆上氣。強陰益男子精。心腎不交者宜之。兼入肺腎二經。味酸而斂。耗散之。金性溫而滋不足之水。生津止渴。益氣強陰。壯水鎮陽。收瞳子散大。定喘欬汗。加乾薑治冬月肺寒欬嗽。同人參門冬治夏月精神困乏而虛熱久嗽。不可誤用表散。須以此去核之辛溫助火。但用

皮肉之酸鹹以滋化之。不宜多用。恐酸收太過。反致閉遏而成虛熱也。黃昏嗽乃火浮於肺。不宜涼藥。宜五味子。欬而降之。但風邪在表。痘疹初發。一切停飲。肺家有實熱者。皆當禁之。

覆盆子

本經名蓬蘽

甘平微溫無毒。酒浸一宿炒用。

本經安五藏益精氣。長陰令人堅強。志倍力有子。久服輕身不老。

發明 覆盆子乃蓬蘽之實。本經言蓬蘽者。藥卽實也。或云蓬蘽是覆盆苗分之爲二。殊爲未當。宗奭云。

覆盆益腎藏縮小便服之當覆其溺器故名本經專
於煖子藏服之令人多子別錄言益氣輕身令髮不
白甘溫補血與桑椹同功惟秦地山中有之近世真
者絕罕藥肆每以樹莓代充欲驗真偽以酒浸之色
紅者是真否卽是假

使君子 甘溫無毒微煖去殼

發明 凡殺蟲藥都是苦辛惟使君子甘而殺蟲不
傷脾胃大人小兒有蟲病者每月上旬清晨空腹食
數枚或爲散肥湯服之次日蟲從大便出忌飲熱茶

犯之卽濕。凡蟲皆脾胃虛弱飲食停滯而生。此物甘
濕。既能殺蟲。又益脾胃。所以能斂虛熱而止濕。爲小
兒蟲積上藥。

木鱉子 土木鱉苦溫小毒。番木鱉苦寒大毒。又附
子之初生未成者曰漏藍子。炮炙論名木鱉子。與此
不同。

發明 木鱉有二種。有殼者曰土鱉。去殼搗爛。帛裏
塞鼻起。倒睫拳毛。又爲末唾調貼痔痛。七日卽消。一
切癰腫醋磨塗之。一種無殼者曰番鱉。治熱病喉痺。

作痛和山豆根青木香磨汁嚥之。癰瘡入眼。翳木鱉
半筒同輕粉冰片麝香爲末。左目吹右耳。右目吹左
耳。日二次。癰瘡自退。又能毒狗。狗性大熱。此性大寒。
寒熱相反。激之使然。

馬兜鈴 苦辛微寒無毒。去殼微焙用。

發明 諸藥之性輕浮者。皆能入肺散氣。燈心馬勃
之屬皆然。諸家言其性寒。專於劫痰定喘。不知其苦
中帶辛寒。中帶散。是以肺熱痰喘。聲音不清者宜之。
錢氏補肺阿膠散用之。取其清熱降氣。邪去則肺安。

矣。性善湧泄。故纂要治蛇蠱毒。一味濃煎服之。探吐其毒。卽解。嬰兒麻疹內陷。喘滿聲瘖者。宜加用之。若肺冷金寒。喘嗽失音者。禁用。

青木香

卽馬兜鈴根

辛苦微寒無毒。

發明 青木香苦寒。香細入足少陰。善降陰氣上逆。故治風溫。葳蕤湯用之。并治癰腫痰結。氣凝諸痛。唐本治熱腫蛇毒。木磨傅之。肘後治蠱毒酒水煎服。之毒從小便出。昔人言多服令人吐利。肺寒欬嗽。寒痰作喘。胃虛畏食。人勿服。以其辛香走竄也。

預知子

苦寒無毒。大明曰溫。

發明 預知子專殺蟲療蠱。其治疰瘕蛇毒。總是殺蟲之功。相傳取子二枚。綴衣領上。遇有蠱毒。則聞其子有聲。故名預知。蜀人極貴重之。

牽牛 苦辛溫有毒。東垣云辛熱有毒。有黑白二種。名黑丑白丑。凡用生磨取頭末。

發明 牽牛專一行水。峻下之劑。白者屬金。利肺。治上焦痰飲。除壅滯氣逆。通大腸風秘。除氣分溼熱。黑者屬水。瀉腎而兼瀉脾胃之溼。消腫滿脚氣。利大小

便秘。但病在血分。或病人稍弱而痞滿者。不可用東垣云。牽牛非神農藥也。各醫續注云。味寒能除溼氣。利小便。治下注脚氣。此說氣味主治俱誤。凡用牽牛。少則動大便。多則泄下如水。乃瀉氣之藥。其味辛辣。久嚼猛烈雄壯。所謂苦寒安在哉。夫溼者水之別稱。有形者也。若受溼氣。不得施化。致大小便不通。宜暫用之。况牽牛止能泄氣中之溼熱。不能除血中之溼熱。每見酒食過傷病痞者。多服牽牛散。取快一時。藥過仍痞。以致久服。脫人元氣。猶不知悔也。東垣治下

焦虛腫。天真丹用牽牛以鹽水炒黑。佐沉香杜仲補骨脂觀桂諸藥。深得補瀉兼施之妙用。方見醫學發明。

紫葳

一名凌霄

酸微寒無毒。

本經主婦人產乳餘疾。崩中癥瘕。血閉寒熱羸瘦。養胎。

發明 凌霄花手足厥陰血分藥也。能去血中伏火。本經主婦人崩中癥瘕。又治血閉寒熱羸瘦。云養胎者。以有積瘀在內。瘀散則胎自安也。與金匱桂心扶

苓丸中。用桃仁丹皮。治妊娠癥瘕。害無異。癥瘕血閉。血氣刺痛。癰風惡瘡。多用之。皆取其散惡血之功也。若無瘀血。而胎息不安者。禁用。

旋花

一名
枝牡丹

甘辛溫無毒。制雄黃。

本經主面肝黑色。媚好益氣。根主腹中寒熱邪氣。

發明 凡藤蔓之屬。象人之筋。所以多治筋病。旋花根細如筋。可啖。本經言主腹中寒熱邪氣。別錄言其久服不饑。時珍自京師還。見北地車夫每載之。云暮歸煎湯飲。可補損傷。則益氣續筋之說。尤可徵矣。筋

被所斷者。用旋花根搗汁。瀝斷處。仍以滓敷。日三易。半月卽續。

薔薇

子名營實

酸溫無毒。

本經營實主癰疽惡瘡。結肉跌筋。敗瘡熱氣。陰蝕不瘳。利關節。

發明 薔薇乃野生之白花者。性專解毒。其實兼能散結。結肉跌筋。敗瘡陰蝕。皆得療之。本經所主。皆言其實。根能入陽明經。除風殺蟲。故癰疽瘡癰常用之。千金治消渴尿多。以根煮飲。又治口瘡之神藥。聖惠

治小兒遺尿酒者服之。皆取其溫足陽明而足太陽受陰矣。

月季花

俗名月月紅

甘溫無毒

發明 月季花爲活血之良藥。搗敷腫瘍用之。痘瘡觸犯經月之氣而伏陷者。用以加入湯藥。卽起。以其月之開放。不失經行常度。雖云取義亦活血之力也。

桔萸實

甘寒無毒。去殼紙包壓去油用。反烏附。

發明

桔萸實甘寒潤燥。宜其爲治嗽消痰止渴之

要藥。以能洗滌胸膈中垢膩鬱熱耳。仲景治喉痺痛

引心腎欬唾喘息及結胸滿痛皆用枯蘘實。取與甘
寒不犯胃氣能降上焦之火使痰氣下降也。其性較
枯蘘根稍平而無寒鬱之患。但脾胃虛及嘔吐自利
者不可用。

枯蘘根

即天
花粉

苦寒無毒反烏附。

本經主消渴身熱煩滿大熱補虛安中續絕傷。
發明 枯蘘根性寒降膈上熱痰潤心中煩渴除時
疾狂熱祛酒痺溼黃治癰瘍解毒排膿。本經有安中
補虛續絕傷之稱以其有清胃祛熱之功火去則中

氣安津液復則血氣和而絕傷續矣。其性寒降。凡胃虛吐逆。陰虛勞嗽。誤用反傷胃氣。久必泄瀉喘欬。病根愈固矣。凡痰飲色白清稀者。皆當忌用。

土瓜根

卽王瓜根

苦寒無毒。藏器云。有小毒。

本經主消渴內疸。瘀血月閉。寒熱痠疼。益氣愈聾。

發明 王瓜產南方者。稟溼熱之氣最盛。患瘡腫癰毒者。食之爲患轉甚。產北地者。得春升之氣。最先患消渴內疸者。用之其効頗捷。其根治黃疸消渴。與枯蓂之性不甚相遠。但不能安中補虛。續絕傷調和經。

絡諸血也。金匱治婦人經水不調，帶下，少腹滿，一月再見者，土瓜根散主之。深得本經主瘀血月閉之旨。方用土瓜根、芍藥、桂心、麝蟲等分爲末，酒服方寸匕，日三服。蘇頌治小兒發黃，土瓜根生搗汁服三合，不過三次，効。又治黃疸變黑，土瓜根汁平旦溫服一小升，午刻黃水從小便出。其治寒熱痠疼，皆祛溼熱之驗。南陽治陽明經熱，大便不通，削之爲導，以下溼熱。其子治肺痿吐血、腸風瀉血、赤白痢及反胃吐食，惜乎世醫未知用也。

葛根 甘平無毒色白者良。入陽明表藥。生用。胃熱煩渴煨熟用。

本經主消渴身大熱。嘔吐諸痺。起陽氣。解諸毒。發明 葛根性升屬陽。能鼓舞胃中清陽之氣。故本經主消渴身熱嘔吐。使胃氣敷布。諸痺自開。其言起陽氣。解諸毒者。胃氣升發。諸邪毒自不能留而解散矣。葛根乃陽明經之藥。治頭額痛。肩稜骨痛。天行熱氣。嘔逆發散。解肌開胃止渴。宣痲發痘。若太陽經初病。頭腦痛而不渴者。邪尚未入陽明。不可使用。恐

引邪內入也。仲景治太陽陽明合病自利及不利但嘔者俱用葛根湯。太陽病下之遂利不止喘汗脈促者葛根黃芩黃連湯。此皆隨二經表裡寒熱輕重而爲處方。按證施治靡不應手神効。又葛根葱白湯爲陽明頭痛仙藥。斑疹已見點不可用葛根升麻恐表虛反增斑爛也。又葛根輕浮生用則升陽生津熟用則鼓舞胃氣。故治胃虛作渴七味白朮散用之。又清暑益氣湯兼黃蘗用者以暑傷陽明額顙必脹非此不能開發也。○花能解酒毒葛花解酲湯用之必兼

人參但無酒毒者不可服服之損人天元以大開肌肉而發泄傷津也

天門冬

即大棘根

甘寒無毒。焙熱去心用。肥白者良。忌

鯉魚。

本經主諸暴風溼偏痺。強骨髓。殺三蟲。去伏尸。久服輕身益氣延年不饑。

發明

天門冬手太陰肺經氣分藥。兼通腎氣。欬逆

喘促。肺痿肺癰。吐血衄血。乾欬痰結。其性寒潤。能滋肺。肺氣熱而燥者宜之。肺爲清虛之藏。涼則氣寧。熱

則氣騰天門冬能係肺使氣不受火擾合地黃麥門冬主心肺虛熱欬吐膿血又能治熱淋同參著定虛喘蓋肺肅則氣化乃能出若脾虛而泄瀉惡食者雖有前證亦莫輕投以其降泄太過也時珍云天門冬清金降火益水之上源故能下通腎氣入滋補方用之有效若脾胃虛寒人久服必致滑腸反成痼疾以性寒能利大腸故也本經治諸暴風溼偏痺蓋熱則生風暴則屬火偏痺者溼熱所致故治風先清火清火在養陰也其三蟲伏尸皆脾腎溼熱所化清二經

溼熱則無三蟲伏尸之患矣。又能延年不饑。故辟穀方多用之。

百部 苦微甘小毒。肥白者良。抽去心用。則不煩悶。本經主欬嗽上氣。火炙酒漬飲之。

發明 百部爲殺蟲要藥。故肺熱勞瘵喘嗽。有寸白蟲。宜之。螭蟲痢及傳尸骨蒸。多用之。時珍云。天麥門冬之類。皆主肺痰。但百部氣溫。肺胃寒者宜之。二冬性寒。肺胃熱者宜之。脾胃虛人勿用。以其味苦傷胃也。又濃煎洗牛馬蝨。樹木蟲蛀。用填孔中。更削杉木。

塞之其蟲卽死殺蟲之功於此可知

何首烏

一名夜交藤

苦瀉微溫無毒其形圓大者佳須

赤白並用製法以竹刀刮去皮拌黑豆九蒸九晒候用禁犯鐵器忌萊菔諸血勿與天雄烏附薑辛仙茅等同用爲其性斂味濇也

發明 何首烏足厥陰少陰藥也性稟陰中之陽產南方者最勝北地所生雖極大者殊不足珍以地偏屬陰而無陽生之力也白者屬氣分赤者屬血分腎主閉藏肝主疏泄以此氣溫味苦瀉苦走腎溫補肝

能收斂精氣。所以養血益肝。固精益腎。健筋骨。烏鬚髮。爲滋補良藥。不寒不燥。功在地黃。天門冬。諸藥之上。氣血大和。則風虛斑腫。癰瘰之疾。可愈。生則性兼發散。主寒熱瘧瘧。及癰疽背瘡。皆用之。今人治津血枯燥。及大腸風秘。用鮮者數錢煎服。卽通。以其滋水之性最速。不及封藏。卽隨之而下洩也。與菴蓉之潤燥通大便無異。而無助火之虞。腸風藏毒。用乾者爲末。米飲日服二三錢。有效。蓋其內溫肝腎。外祛少陰風熱之驗也。丹方治久瘡。用生乾何首烏一兩。柴胡

三錢黑豆隨年數加減煎成露一宿。清晨熱服。若夜瘡尤効。乃散中寓收。補中寓散之法。

葶藶 苦甘平無毒。產川中大塊。色白而鬆脆者爲葶藶。若色黃赤者。卽菝葜也。一種小塊。質堅韌者爲土葶藶。不堪入藥。忌茗醋。

本經主腰脊痛。強骨節。除風寒溼周痺。惡瘡。不瘳。熱氣。

發明 葶藶苦平。胃與肝家藥也。入肝搜風。本經主腰脊痛。強骨節。入肝祛風。入胃祛溼。故本經主寒溼。

周痺惡瘡熱氣等病。昔人稱其攝精之功。或稱逐水之効。何兩說相懸耶。不知胃氣健旺。則溼濁去而腎無邪澤之擾。腎藏自能收攝也。楊氏革薺。分清飲。專主濁病。正得此意。又主陰痿失溺。老人五緩者。總取行陽之力。以利關節。助健運也。若陰虛精滑。及元氣下陷。不能攝精。小便頻數。大便引急者。誤用。病必轉劇。以其溫散。不利於陰也。菝葜與革薺相類。別錄主腰背寒痛風痺。皆取祛溼熱利水堅筋骨之義。

土茯苓

俗名冷飯團

甘淡平無毒。忌鐵器。

發明 土茯苓古名山牛入胃與肝腎清溼熱利關節止拘攣除骨痛主楊梅瘡解汞粉毒時珍云楊梅瘡起於嶺南風土炎熱鼠瘻薰蒸挾淫穢熱之邪發爲此瘡今則通行海宇類有數種治之則一屬厥陰陽明如兼少陰太陽陽明發於咽喉兼太陽少陽發於頭角蓋相火寄在厥陰肌肉屬於陽明若用輕粉刮劑毒氣竄入經絡筋骨莫之能出變爲筋骨攣痛發爲結毒遂成痼疾方用土茯苓一兩薏苡忍冬防風木瓜木通白蘚皮各五分皂莢子四分人參當

歸各七分。日服三次。忌飲茶燒酒。及牛羊雞鵝魚肉。
麩麩鹽醬。并戒房勞百日。渴飲土茯苓湯半月全愈。
白歛 苦甘辛微寒小毒反烏附解狼毒毒

本經主癰腫疽瘡散結氣止痛除熱目中赤小兒驚
癇溫瘧女子陰中腫痛帶下赤白。

發明 白歛性寒解毒敷腫瘍瘡有解散之功。以其
味辛也。但陰疽色淡不起。胃氣弱者非其所宜。本經
治目赤驚癇溫瘧。非取其解熱毒之力歟。治陰腫帶
下。非取其去溼熱之力歟。金匱薯蕷丸用之。專取其

辛涼散結以解風氣百疾之蘊蓄也。世醫僅知癰腫解毒之用陋哉。同地膚子治淋濁失精同白芨治金瘡失血同甘草解狼毒之毒。其辛散之功可知。而癰疽已潰者不宜用。

山豆根 苦寒無毒。

發明 山豆根太苦大寒。故能治咽喉諸疾。蘇頌言含之嚥汁解咽喉腫痛極妙。或水浸含漱。或煎湯細呷。又解痘疹熱毒及喉痺藥皆驗。蓋咽證皆屬陰氣上逆。故用苦寒以降之。開寶言解諸藥毒止痛消瘡。

腫毒發熱欬嗽。善治人馬急黃。殺小蟲。時珍云。腹脹喘滿。研末湯服。血氣腹脹。酒服三錢。卒患熱厥心痛。磨汁服。總賴苦寒以散之。但脾胃虛寒作瀉者禁用。黃藥子 苦平無毒。

發明 黃藥子治諸惡腫瘡癰喉痺及蛇犬咬毒。研水服之。并用外塗。千金治癰疾。以黃藥子半觔無灰酒一升浸藥固濟瓶口。糠火煨候香。瓶頭有津卽止。時飲一杯。不令絕。三五日卽消。勿飲不爾。令人項細也。又專治馬牛心脾熱病。

白藥子

葉名
剪草

辛涼無毒。

發明 白藥子辛涼解毒。故能治金瘡出血太多。發熱。用以涼血清熱。則痛自止。肌自生。又主喉中熱塞。不通時。常痛腫。醋煎細呷。治諸骨鯁。在上卽吐出。在下卽便出。解野葛生金巴豆藥毒。又治馬脾肺熱病。

威靈仙

苦辛溫小毒。

發明 威靈仙性善下走。通十二經。故能宣通五藏。治胃脘積痛。脚脛痺溼。痛風之要藥。消水破堅。積朝食暮効。辛能散邪。故主諸風。溫能泄水。故主諸溼。而

痘疹毒壅於上不能下達腰下脛膝起灌遲者用爲下引立効其性利下病人壯實者誠有殊効氣虛者服之必虛瀉而成痼疾以其耗血走氣也血虛而痛不因風溼者勿服

茜草

素問名薺茹又名薺薺俗名血見愁

苦辛微溫無毒

本經主寒溼風痺黃痺補中

發明 茜根色赤而性溫味苦而帶辛色赤入營性溫行滯味辛入肝手足厥陰血分藥也本經又以治寒溼風痺黃痺者是溼熱之邪痺著營分用以清理

邪淫則脾胃健運。寒溼風痺無所留著。而黃痺自除矣。其治女子經水不通甚効。詳素問四烏鯁一蘆茹丸。凡治婦人脫血血枯。千金翼治內崩下血。皆取以散經中瘀積也。病人雖見血證。若泄瀉飲食不進者勿服。

防己 辛苦寒有毒。

本經主風寒溫瘧熱氣諸病。除邪利大小便。發明 防己辛寒純陰。主下焦血分之病。性劣不純。善走下行。長於除溼。以辛能走散。兼之氣悍。故主風。

寒溫瘧熱氣諸病除邪利大小便此本經主治也別錄療水腫膀胱熱通腠理利九竅皆除溼之功也弘景曰防己是療風水要藥漢防己是根入膀胱去身半已下溼熱木防己是苗走陽蹻治中風攣急風痺溼熱金匱防己黃耆湯防己地黃湯木防己湯五物防己湯皆治痰飲溼熱之要藥而千金治遺尿小便濇有三物木防己湯水腫亦有三物木防己湯總取其通行經脈之力也能瀉血中溼熱通經絡中滯塞險健之類用之不得其宜下咽令人心煩飲食減少

至於去溼熱腫痛下注脚氣膀胱積熱誠通行十二經之仙藥也。如飲食勞倦陰虛內熱以防已泄大便則重亡其血其不可用一也。大渴引飲及久病津液不行上焦溼熱等證防已乃下焦血藥其不可用二也。外感邪傳肺經氣分溼熱而小便黃赤此上焦氣病其不可用三也。大抵上焦溼熱皆不可用卽下焦溼熱又當審其二便不通利者方可用之。

木通

原名通草

平淡無毒色淡黃細香者佳。

本經除脾胃寒熱通利九竅血脈關節令人不忘去

惡蟲

發明 木通。蔓真根也。入手足太陽。手少陰。厥陰。瀉氣分。溼熱。防已。瀉血分。溼熱。脾胃不和。則水道不利。乃致鬱爲寒熱。爲腫脹。爲淋秘。爲痺痺。俱宜木通。淡滲之劑。分利陰陽。則水行火降。脾胃和而心腎平矣。本經除脾胃寒熱者。以其通利溼熱也。曰通利九竅。血脈關節者。以其味淡滲也。曰令人不忘。及去惡蟲者。竅利則神識清。溼散則惡蟲去。以其通達九竅。行十二經。故又能催生下乳。散癰腫結熱。惟胃虛腎冷。

及傷寒大便結燥。表虛多汗者。禁服。恐重傷津液。耗散胃汁也。時珍曰。木通上能通心。清肺達九竅。下能泄溼祛熱。豈止利小便而已哉。蓋能泄丙丁則肺不受邪。能通水道。水源既清。而諸經之溼熱。皆從小便泄去。故導赤散用之。

通草

原名通脫木

平淡無毒

發明 通草輕虛色白。專入太陰肺經。引熱下降。而利小便。入陽明胃經。通氣上達。而下乳汁。東垣言瀉肺利小便。治五淋。水腫癰閉。取氣寒降。味淡而升。仲

景當歸四逆湯用以通在裡之溼熱也。妊婦勿服。以其通竅也。

鈎藤

一名鈎藤

甘微苦寒無毒。取鈎用良。

發明

鈎藤手足厥陰藥也。足厥陰主風。手厥陰主

火。小兒急慢驚癇。瘈瘲內釣。腹痛客忤。胎風大人肝風。頭旋目眩。婦人帶下赤白。皆肝風相火之病。肝木風靜火息。則諸證自除矣。

木蓮

俗名象饅頭

實甘平。瀉葉酸平無毒。

發明

木蓮辟荔實也。性耐風霜。嚴冬不凋。故能治

一切風癰惡瘡爲利水治血通乳要藥。古方以木蓮二枚用豬前蹄煎湯飲汁盡。一日乳汁卽通。無子婦人食之亦能有乳。其葉主背瘡。取葉搗絞汁和蜜飲數升。以滓敷之。後利卽愈。煎湯主賊風疼痛。乘熱熏洗。日二次。痛止爲度。取藤搗絞汁治白癰風燥癰惡瘡。疥癬消腫散毒。療腸痔心痛陰頰。但南方有瘴氣人不可用。

紫葛 甘苦寒無毒。生山谷中。苗似葡萄。長丈許。根紫色。今在所皆有之。

發明 紫葛和血解毒治癰腫惡瘡取根皮搗爲末
酢和封之千金紫葛丸用之爲君以其能散寒熱結
氣也

葎草

一名勒草一名葛勒蔓俗名割人藤

甘苦寒無毒

發明 葎草蔓生道傍多刺勒人故又名葛勒蔓專
主五淋利小便散瘀血並搗汁服千金專主膏淋以
醋和服之

忍冬

卽金銀花

甘溫無毒

發明

金銀花芳香而甘入脾通肺主下痢膿血爲

內外癰腫之要藥解毒祛膿。瀉中有補。癰疽潰後之聖藥。今世但知其消腫之功。昧其能利風虛也。但氣虛膿清。食少便瀉者。勿用。用痘瘡倒陷不起。用此根長流水煎浴。以痘光壯爲効。此卽水楊湯變法。

清風藤 辛溫小毒。

發明 清風藤入肝經氣分。治風溼流注。歷節鶴膝。麻痺癢癢。同防已浸酒。治風溼痺痛。一切風病。熬膏酒服一匙。將患人身上拍一掌。其後遍身發癢。不可當急。以梳梳之。欲癢止。飲冷水一口。卽解。風府皆愈。

避風數日自安。

藤黃 酸。瀉有毒。

發明 藤黃性毒而能攻毒。故治蟲牙。蛀齒。點之。卽落。毒能損骨傷腎。可知。

水草部

澤瀉 甘。鹹。微寒。無毒。白者良。利小便。生用。入補劑。鹽酒炒。油者。伐胃傷脾。不可用。

木經主風寒溼痺。乳難。養五藏。益氣力。肥健。消水。久服。耳目聰明。不饑延年。

發明 澤瀉甘鹹沉降陰中之陽入足太陽氣分素問治酒風身熱汗出用澤瀉生木麋銜以其能利膀胱溼熱也金匱治支飲冒眩用澤瀉湯以逐心下痰氣也治水畜煩渴小便不利或吐或瀉用五苓散以泄太陽邪熱也其功長於行水本經主風寒溼痺言風寒溼邪痺著不得去則爲腫脹爲癰閉用此疏利水道則諸證自除蓋邪干空竅則爲乳難爲水閉澤瀉性專利竅竅利則邪熱自通內無熱鬱則藏氣安和而形體肥健矣所以素多溼熱之人久服耳目聰

明然亦不可過用。若水道過利，則腎氣虛，故扁鵲云：多服病人眼。今人治泄精，多不敢用，蓋爲腎與膀胱虛寒而失閉藏之令，得澤瀉降之，而精愈滑矣。當知腎虛精滑，虛陽上乘，而目時赤者，誠爲禁劑。若溼熱上盛而目腫，相火妄動而遺泄，得澤瀉清之，則目腫退而精自藏矣。何禁之有？仲景八味丸用之者，乃取以瀉膀胱之邪，非接引也。古人用補藥，必兼瀉邪，邪去則補藥得力矣。

羊蹄根

俗名
秃菜

辛苦寒小毒。傍莖有鈎，如波稜菜狀。

夏末結子便枯者是也。

本經主頭禿疥癢除熱女子陰蝕。

發明 羊蹄根屬水走血分爲除溼殺蟲要藥故本經治頭禿疥癢女子陰蝕之患新採者醋搗塗癬殺蟲加輕粉尤効。

菖蒲 辛溫無毒解巴豆大戟毒。

本經主風寒溼痺欬逆上氣開心孔補五藏通九竅明耳目出音聲主耳聾癰瘡溫腸胃止小便利久服輕身不忘不惑延年益心智高志不老。

發明 菖蒲乃手少陰厥陰之藥。心氣不足者宜之。
本經言補五藏者。心爲君主五藏係焉。首言治風寒。
溼痺。是取其辛溫開發脾氣之力。治欬逆上氣者。痰。
溼壅滯之喘欬。故宜搜滌。若肺胃虛燥之喘欬。非菖。
蒲可治也。其開心孔通九竅。明耳目。出音聲。總取辛。
溫利竅之力。心孔開九竅利。則癰瘡之毒可解。腸胃。
喜溫惡寒。腸胃旣溫。則膀胱之虛寒。小便不禁。自止。
久服輕身者。除溼之驗也。不忘不惑。延年益智。高志。
不老。皆補五藏通九竅之力也。又主肝虛心腹痛。霍。

亂轉筋。消伏梁癰。善通心脾痰濕。可知千金治胎動不安。半產漏下。或搶心下血。及產後崩中不止。並以菖蒲一味煎服。凡陽亢陰虛。婆寡失合者。禁用以其性溫。善鼓心包之火。與遠志之助相火不殊。觀本經之止小便利。其助陽之力可知。

蒲黃 甘微寒。無毒。筋能行血。羅去粗筋。取粉用。本經主心腹膀胱寒熱。利小便。止血。消瘀血。

發明 蒲黃手足厥陰血分藥也。故能治血治痛。本經主心腹膀胱寒熱。良由血結其處。營衛不和故也。

又言止血消瘀血者。以生則能行。熟則能止。與五靈脂同用。名失笑散。治一切心腹疼痛。能破瘀積。消癰腫。去產婦兒枕痛。然胃氣虛者。入口必吐。下咽則利。以五靈脂性味濁惡也。宋度宗一夜忽舌脹滿口。用蒲黃乾薑末乾摻而愈。以蒲黃之涼血活血。乾薑之引火外散。深得逆從兼濟之妙用。然舌根脹痛。亦有屬陰虛火旺者。誤用前法。轉傷津液。每致燥瀉。愈甚。不可不審。

苦草 苦溫無毒。

發明 苦草香竄入足厥陰肝經。理氣中之血。產後煎服。能逐惡露。但味苦伐胃。氣竄傷腦。膏粱柔脆者服之。減食作瀉。過服則晚年多患頭風。昔人畏多產育。以苗子三錢。經行後麴淋酒服。則不受妊。傷血之性可知。煎湯主婦人白帶。又治嗜食乾茶而黃無力。爲末和炒芝蔴。不時嚼之。

水萍 辛寒無毒。浮水面小而背紫者是。

本經主暴熱身癢。下水氣勝酒。長鬚髮。止消渴。

發明 浮萍發汗勝於麻黃。下水捷於通草。惡疾癰。

風遍身者濃煎浴半日多効其性輕浮入肺經達皮膚故能發揚邪汗本經主暴熱身癢者專疎肌表風熱也下水氣者兼通陽明肉理也勝酒者陽明通達而能去酒毒也長鬚髮者毛竅利而血脈榮也止消渴者經氣和而津液復也浮萍爲祛風專藥去風丹用紫背浮萍爲末蜜丸彈子大豆淋酒下一丸治大風癩風一切有餘風濕脚氣及三十六種風皆驗而元氣本虛人服之未有不轉損劇者至於表虛自汗者尤爲戈戟。

葶 甘寒無毒

發明 葶性味滑。常食發氣。令關節急。患痔漏脚氣。積聚皆不可食。爲其寒滑傷津也。千金方治熱瀉嘔逆。漏氣。澤瀉湯。麥門冬湯。並用之。取其清胃脘之熱逆也。又能壓丹石。解百藥毒。

海藻 苦鹹寒小毒。反甘草。

本經主瘰癧結氣。散頸硬核。療癰腫。癥瘕。堅氣。腹中上下雷鳴。下十二種水腫。

發明 海藻鹹能潤下。寒能泄熱利水。故本經主瘰。

瘰結核癰腫癥瘕散十二經水及除浮腫脚氣留飲
痰氣之溼熱使邪從小便而出經云鹹能軟堅營氣
不從外爲浮腫隨各引經藥治之凡海中諸藥性味
相近主療一致雖有不同亦無大異

昆布 鹹寒滑小毒

發明 鹹能軟堅故瘰瘕如石者非此不除能破陽
邪水腫與海藻同功然此物下氣久服瘦人海島人
常食之水土不同故耳凡海中菜皆損人不獨昆布
海藻爲然

石草部

石斛 甘淡微苦。鹹平。無毒。酒浸用。種類最多。惟川者味甘淡。色黃無岐。可無傷胃之虞。古稱金釵者爲最。以其色黃如金。旁枝如釵。故有是名。近世絕無此種。川者差堪代用。其餘雜產。味苦色晦。中虛多岐者。味皆極苦。悞用損人。凡入湯藥。酒浸晒乾。入丸劑。薄切。米飲漿。晒乾磨之。

本經主傷中除痺。下氣補五藏虛勞羸瘦。強陰益精。久服厚腸胃。

發明 石斛足太陰少陰脾腎之藥甘可悅脾故厚腸胃而治傷中。鹹能益腎故益精氣而補虛羸。爲治胃中虛熱之專藥。又能堅筋骨強腰膝。骨痿痺弱。囊溼精少。小便餘瀝者宜之。

骨碎補

俗名
猴薑

苦溫無毒。蜜水焙用。

發明 骨碎補足少陰藥也。骨傷碎者能療之。故名。主骨中毒氣風氣耳鳴牙疼骨痛破血止血折傷接骨。又治腎虛久瀉。以之爲末。人豬腎中煨熟食之。戴元禮治痢後骨痿。入虎骨四觔丸用之。有效。但其性

降收。不可與風燥藥同用。

石韋。苦微寒無毒。凡用去黃毛。不爾射人肺。令欬不已。去梗微炙用。

本經主勞熱邪氣。五癰閉不通。利小便水道。

發明 石韋蔓延石上。生葉如皮。其性寒利。故本經治勞熱邪氣。指勞力傷津。癰閉不通之熱邪而言。非虛勞之謂。治妊娠轉胞。同車前煎服。

景天

一名與火草
俗名火丹草

苦寒無毒

本經主大熱火瘡。身熱諸邪惡氣。

發明 慎火草性能涼血解毒故本經治大熱火瘡。日華治熱狂赤眼頭痛寒熱遊風女子帶下千金慎火散以之爲君專主血熱崩中帶下之病搗汁塗小兒丹毒發熱及遊風熱瘡外用並效一切病得之寒溼惡寒喜熱者勿投。

石胡荽

卽天胡荽俗名鵞不食草又名雞腸草

辛溫無毒汁製

砥石雄黃

發明 鵞不食草氣溫而升味辛而散故能透達巔頂人但知其搐鼻通而落癰肉不知其治頭風之功最捷而除腎之功更奇按塞鼻中腎膜自落故碧雲

散用以取嚏。則濁氣宣通而瞽自除。是昔人以開鍋蓋法喻之。

地錦

一名地朕

苦平無毒。

發明 地朕多生庭除磚縫。莖赤葉青。繁絲如錦。故有是名。能通流血脈。治崩中痢下。功專散血止血。通利小便。千金治淋方用之。

苔草部

陟釐

甘溫無毒。生於水底石上者。蒙茸如髮。謂之

陟釐

發明 陟釐與水苔同生水中但浮於水者謂之水
苔千金治協熱下痢嘔逆溫食則吐有陟釐丸爲痢證
之首方日華搗汁治天行心悶別錄主心腹大寒溫
中消穀強胃氣止泄痢竝取其性溫而能利水也
石蕊名蒙頂茶甘溫無毒生蒙山頂石面及枯株上
與木耳無異

發明 石藥明目益精氣潤咽解熱化痰同生薑能
解陽明頭額眉稜骨痛本乎天者親上也

卷栢 辛平無毒桐君雷公云甘寒無毒鹽水煮半

日再以井水煮半日用生用破血兼用止血

本經主五藏邪氣女子陰中寒熱痛癥瘕血閉絕子
久服輕身和顏色

發明 卷栢足厥陰經血分藥也詳本經諸治一皆
女子經癸之病總厥陰與衝脈之患也千金大澤蘭
丸紫石英天門冬等丸皆用之經疏言妊婦禁用以
其能寒子藏中血氣也

馬勃 辛平無毒多生竹園溼地腐脹而成凡用以
生布張開將馬勃於上摩擦下以盤承取末用之

發明 馬勃輕虛上浮力能散肺中邪熱故治欬嗽
喉痺衄血失音諸病東垣治大頭病咽喉不利普濟
消毒飲用之然須生蜜拌揉入水調散不浮方可煎
服

倒掛草 苦甘無毒

發明 倒掛草生井口邊千金斷酒方於端午午時
取燒研水服勿令知卽惡酒不飲其樹孔中生者千
金用治癭瘤取其倒垂而根不著也

苔 甘寒無毒

發明 井中蒼苔得至陰之氣而生火瘡傷爛脫皮者以苔炙末每錢入冰片二分杵極細摻上痛卽止。不過三度愈如無井中者牆陰地上者亦可用之。

本經逢原卷之二終